

東

華

續

錄

臣朱壽朋敬編

臣章圭瑛恭校

冬十月內黃朔雪○諭李鴻章奏故員內虧短各款請查抄備抵等語直隸故員內虧短各款請查抄備抵以重庫款該部知道○子貴州內虧短止雜各款業經革職勒追並於東安平谷房山順義懷柔薊州各州縣任內虧短銀兩為數甚鉅亦經咨籍著追均未完繳殊屬玩延著李鴻章舉道遠沈秉成飭查該故員歷過任所寓所有無資財存頓分別查封訊追並著孫鳳翔飭屬將該故員原籍家產迅速查抄備抵以重庫款該部知道○子貴州平遠縣節婦錢丁氏旌表○丁卯欽奉 慈禧端佑康頤昭豫莊誠皇太后懿旨醇親王奏大員報捐銀兩懇請獎勵一摺止藍旗蒙古都統長善捐備購辦機器銀四千兩洵屬益公長善著賞戴花翎該部知道○諭軍機大臣等中越勘界事宜前經諭令周德潤鄧承修會同各該督撫詳細勘定此事關係重大必應慎之於始各處所繪地圖詳略不一法使所攜難保不互有異同目前分界自應以會典及通志所載圖說為主仍須履勘地勢詳加斟酌若於兩界之間留出隙地若干里作為甌脫最為相宜○諭京師溝渠河道年久失修近多淤塞應如何分年籌款陸續修濬之處著該管大臣詳細履勘查明具奏○已

已命編修李培元高煥恩在上書房行走編修吳樹梅在南書房行走○庚午錫綸奏奴才前經飭派統領綏靖營記名提督署塔城總理屯防副將劉文和赴 欽差大臣甘肅新疆巡撫劉錦棠行營迎提光緒十一年分新餉請將該副將臨行時面稟以塔城人民稀少每於勇丁革故出缺募補甚難擬自籌款項歸途招募餘丁帶領回營以備出缺時補額等語奴才當查該副將既係自行籌款且事屬因公姑允所請去後嗣據該副將稟稱在途患病將由哈密糧臺兩次領銀五萬餘兩先後交委員雷玉等管解回營該副將在瑪納斯調治病體忽於本年六月十一日據前隨該副將出差之外委李生福回營面稟於十二日接據該副將劉文和由驛稟稱歸途在瑪納斯等處新募補額餘丁二百餘名六月初七日行至西湖以北斯魯地方劉文和因病未痊在彼暫歇不料是夜三更時有游匪從外噴擾隨傳齊隊伍但新募餘丁尙無器械以致倉猝被匪衝散該匪引新募人丁數十名結隊向車牌子竄逸探聞此匪係李皮帽黨與仍回伊犁大西溝入夥各等語據此奴才卽飛檄南路防軍並添派選鋒營營總佐領額哲普署守備艾漢章等率所部馬隊越境剿捕一面飛速分咨 欽差大臣甘肅新疆巡撫劉錦棠伊犁將軍金順分飭各軍一體防剿以杜紛竄旋據南路偵探報稱前股游匪數十人由車牌子渡河恐兵追剿將渡船沉溺後向西週逸餘與前黨相同奴才卽札調該營副將劉文和回營查訊據稱各情與各路探報大致

相符奴才伏查斯數里牌子小草湖以西有蕪湖百餘里樹木叢雜自伊犁演勇滋事後時有游匪在彼潛匿乘間肆出搶掠西湖雖有防軍未能搜捕淨盡塔城商民視該處爲畏途該署副將雖係招募補額餘丁與募勇辦法有間然際此伊犁演勇游匪滋擾之時所帶烏合原非舊部並不預籌器械以備不虞以致昏夜遇賊陡然衝散實屬辦事草率本屬咎有應得惟查奴才於光緒四年到任時塔城兵力太單時有回氛竄擾是年秋將劉文和所部馬勇調到巡防探剿地方賴以稍平比以缺餉萬難劉文和撫恤衆勇設法籌食乃能顧全局面嗣經奴才增募兵勇亦頗資劉文和協同整頓塔城境內始得安謐而上年劉文和督率各營試辦開屯收糧亦有成效數年辛勤歷著似未便以一朝獲咎遽事捐棄前勞況邊地求材亦不易得請 旨將副將劉文和卽行革職仍留軍營効力以示懲儆用策將來得 旨如所請行○辛未命江西布政使劉瑞芬開缺以三品京堂候補並賞給二品頂戴○以張端卿爲江西布政使阿克達春爲安徽按察使○壬申賞給江蘇舉人汪士鐸國子監助教銜監生高廷第翰林院待詔銜○癸酉福建臺灣巡撫劉銘傳因病乞休不允賞假兩月○乙亥 慈禧端佑康頤昭豫莊誠皇太后萬壽聖節 上詣 慈禧宮行禮祭 太廟後殿遣載敦恭代行禮○丙子諭軍機大臣等據總理各國事務衙門呈遞許景澄信函所陳寬留風服以杜後來爭衅等語與前次諭飭辦法正相照合目前與法使

會議分界事宜必應博採眾說以資辯論岑毓英前奏擬請開導法使令其退還北圻數省於河內海陽
地方通商等語周德潤鄧承修等與法使晤談時不妨姑持此論以爲抵制疆之分界一事有關大局屬
德潤務當詳度地勢設法辯難多爭一分即多得一分之利益切勿輕率從事○丁丑諭前年據御史馮
應壽奏庫倫辦事大臣桂祥辦事乖謬藉端勒捐等情當派紹祺馳往確查茲據查明具奏此案桂祥被
參上年令甲首捐銀七八千兩查無其事其所提商戶罰款係爲發放各良口分薪水等項之用尙無贓
弊惟派令差官書都那瑪等赴後地勒捐磚茶因商民欠交捐款責打押迫該大臣信用劣員任令追逼
勒捐毫無覺察且捐款已有成數並未具奏種種辦理不善殊難辭咎桂祥著交部嚴加議處卓索圖盟
四等塔布囊書都那瑪卽武忠額既無職任又非調赴庫倫差委人員曠敢擅作威福任意妄爲荒謬已
極著從重發往黑龍江充當苦差筆帖式綸錫於書都那瑪責押商民時但知附和並不攔阻實屬庸劣
不職著卽行革職蒙古辦事大臣那遜綽克圖隨同畫稿協領存得大筆帖式松蔭稿面書押均有不合
著一併交部察議至所請此項捐存磚茶庫倫現無急需應存應提請旨交部辦理等語此項磚茶本非
奏明捐辦之項豈得任意苛派所有現存之茶九百十五箱五塊著交那遜綽克圖賞還原捐各商民按
照所捐多寡數目分別攤給毋任經手員役從中舞弊倘再查有侵蝕情事卽惟該大臣是問餘著照所

擬辦理該部知道○戊寅諭金順泰副都統傷病增劇請開缺回旗可否賞食全俸一摺青州副都統托
雲佈著准其開缺回旗並加恩賞食全俸以資餘年○己卯滿德克吉訥為青州副都統以恩普為鎮江
旗蒙古副都統○庚辰諭鑾儀衛奏直隸欠解地租及應徵本年租銀請飭催迅解一摺直隸藩司欠解
鑾儀衛地租銀兩為數甚鉅現在發放各款需用孔急著李鴻章嚴飭藩司即將歷年欠解該衙門地租
及應徵本年租銀務於年內如數批解以濟要需○諭戶部奏遵議山東巡撫奏被災各州縣核放各賦
請酌撥京餉一摺山東被災各州縣現在散放普賑惟時值隆冬窮黎無術謀生望賑彌切加恩著准其
截撥來年京餉銀五萬兩於應解地丁項下照數撥發即著陳士杰嚴飭印委員核實散放務使實惠均
沾毋任吏胥絲毫弊混以恤災黎餘依議○辛巳賞給貝勒載澂夫人貝勒半俸○諭額勒和布等奏特
參司員並自行檢舉一摺戶部郎中福誠近染嗜好辦事弊混著即革職永不敘用以示懲儆該員本年
京察保列一等所有原保之戶部堂官著吏部查取職名議處○頒給湖北房縣城南半山石洞 關帝
廟及城內 城隍廟紫仍山黑龍洞 龍神祠匾額○賞京師八旗綠步各營官兵一月錢糧開散宗室
覺羅人等兩月錢糧○壬午予雲南思茅羅孝子吳光漢旌表○癸未賞給通州王恕國煮賑米石○甲
申諭臺灣南北地輿表延甚遠以形勢而論臺北各海口尤為緊要原設臺灣道一員連駐臺南深慮難

以兼顧且巡撫常川駐紮一切錢數刑名事宜必須分員管理各專責成應否於臺灣道之外添設臺北
道一員著楊昌濬劉銘傳悉心會商妥議具奏○諭前據劉銘傳奏參臺灣道劉璣貪污狡詐劣跡多端
當將該員革職拿問並將任所原籍資產一并查抄特派錫珍銜榮光馳往查辦該據查明覆奏此案劉
璣被參鹽務礦務營私舞弊各節經錫珍等傳集人證詳核卷宗雖多辦理不善尚無侵吞虧短通同作
弊情事惟於所部各營空額經已革提督高登玉繳入道署銀一萬一千六百餘兩又將夫價銀兩扣存
帳房四千五百餘兩據供留作賞需並無詳報案據又於其子劉濟南招募船價浮冒銀一萬兩等語革
道以監司大員總理營務輒敢虛支鉅款任意浮銷律以監守自盜罪無可辭已革臺灣道劉璣著照所
擬斬監候卽由該督撫派員解交刑部監禁其應繳之款除抄產備抵外餘著勒限追完照例辦理至摺
內所奏薛樹華供稱送給洋銀一萬兩張稅是否轉給劉璣伊不知曉及王青雲等所供洋藥釐金每年
交給道署規費銀二萬七千另九十兩按年轉撥道撥給等語聲敘殊未明晰豈得以事無左證免置
勿論著刑部於全案供招解到時再將以上兩款詳細查明具奏已革提督高登玉明知劉璣虛報夫數
輒代出印領扣繳多贓實屬朋比爲奸著從重發往軍臺効力贖罪已革同知胡培滋管理支應於劉璣
虛報募勇船價等情毫無覺察明知夫餉浮冒又不據實舉發實屬知情徇隱業經革職著永不敘用仍

驅逐回籍不准逗留將張福勝在臺年久聲名平常著卽行革職知府劉濟南素行不檢物議滋多著一併革職餘著照所議辦理該部知道○諭軍機大臣等前據卞寶第劉銘傳先後具奏已革臺灣道劉璈任所原籍資產業經遵旨查抄劉璈現經訊明定罪監禁追贓其在所抄出銀兩卽著劉銘傳派員解部原籍抄出資產著卞寶第按照原單核實變價解部備抵○徐致祥奏於光緒十年十一月條陳山東河工事宜請經 明鑒迄今又一年矣下游決口未塞上游又復潰決漫溢數百里本年八月欽奉 懿旨停止北海工程撥銀賑濟仰見 皇太后 皇上宵旰焦勞無刻不以民生爲念凡有血氣同深銘感然而河患不治今歲如此明歲復然此岸甫堵彼岸又潰沙淤壅積遏之益甚也水勢漫汎障之不能也非併力疏濬集款濟用專員責成得人辦理無以成一勞永逸之計而紓 九重東顧之憂 臣請更爲 皇太后 皇上力陳之查東省黃河內海河口積沙百餘里人人皆知特以工費浩繁籌餉維艱因主築堤之說冀其展拓河身讓地於河其勢或可稍殺不知下游淤墊日甚一日勢愈緩則沙愈滯堤加高則河加長俯視則堤內如釜底之形倒灌則河身如建瓴之勢隨壑隨決旋決旋塞每歲帑項數十萬金何異投諸洪流乎且黃河衝決奔放順逆無常倘竟北趨汎入 畿輔伊於河底而前後數十萬災民靡者斃於溝壑強者肆其劫奪加以各省伏莽根株未絕轉相構煽禍亂滋生臣所慮者不在外侮而尤在

內患也然則疏導之功要於築堤疏導之費亦十倍於築堤方今 朝廷籌辦海防整飭武備誠發憤爲

雄之善策先事預防之深謀顧防海以禦外侮治河以靖內患均爲 國家當今急務聞海防每歲所需

不下五六百萬兩河工大治計非千萬兩不可然一治之後費即可省不必歲歲鉅款也 朝廷費千萬

之帑金固闕全百萬之生命臣知 皇太后 皇上必不惜重帑而藥生靈也然必責有攸歸事乃克濟

山東巡撫管理吏治鹽務海防政事殷繁日不暇給卽才倍於陳士杰者亦難兼顧雖嚴子懲處究無補

於絲毫查河東河道總督本兼轄山東汴工頻歲安瀾或責河南巡撫暫行兼管而移河道總督於山東

專督厥事俾責無旁貸然必 特簡一公正廉明幹濟宏遠之重臣寄以總河鉅任降其倚畀假以便宜

並請先 命其周歷徧視審度地勢訪察輿情毋避怨言毋勝己見東省官紳亦當力顧全局不得各分

畛域致滋聚訟規模既定然後施功則餉不虛糜效可冀樓山東濟東泰武臨道登沂曹濟道運河道職

司河工亦須 簡爲守兼優之員俾資臂助中外臣工如實有通曉河務略任事者無論實缺候補候

選人員請 旨飭下在京六部九卿在外督撫據實保奏不得以鑽營請託者妄用匪人亦不得以空言

無補者濫登薦牘至因公獲咎之員才堪任用者亦許一律保薦恭候 聖裁但不准自行投効爲夤緣

開復之階臣恭繹 列祖 列宗聖訓諄諄以治河爲急至再三 諭戒臣工輒謂河務最難辦理災

民尤可哀矜而慎簡河臣屢頒帑項兢兢為不憚為其難者 祖宗之用心深且遠矣 臣智慮短淺罔補時艱熱懇之衷難安緘默可否 飭下各該大臣統籌緩急詳細規畫或交廷臣會議以期集思廣益諸臣中儘有卓識遠猷足備 聖明採擇者伏望 宸斷折衷施行則天下幸甚 臣等幸甚不獨東省瘡痍沐更生之慶也 上諭太常寺少卿徐致祥奏山東河患日深請卽籌興修一摺據樞東省河工頻歲潰決而宜併力疏導集款濟用並請移河道總督於山東周歷審度以專責成等語著該部妥議具奏所請飭保通曉河務人員以期集思廣益不為無見著京外各員據實保舉用備器使○諭御史金壽松奏吏部選舉未能悉協請飭酌量變通一摺著吏部議奏○諭太常寺少卿徐致祥奏順天鄉試貢院號舍請准增添等語順天鄉試應考人數眾多號舍不敷著加恩酌予添建以遂多士觀光之願卽由順天府會同各該部查勘奏明辦理○命福州將軍穆圖善為欽差大臣會同東三省將軍辦理練兵事宜各城副都統以下均歸節制○前任兩江總督李宗羲卒予祭葬政績付國史館列傳○乙酉 上詣 時應宮拈香○丁亥欽奉 慈禧端佑康頤昭豫莊誠皇太后懿旨前據軍機大臣總理各國事務衙門會同神機營王大臣遵議東三省邊防事宜屯田如果辦理得宜為天地自然之利各該將軍身任地方均屬分內應為之事並著確切商辦原摺片均著鈔給閱看○戊子 上詣 南海自在觀拈香○湖北巡撫

彭祖賢卒子祭葬○己丑以譚鈞培爲湖北巡撫王嵩齡爲江蘇布政使○以瑞璋爲江西按察使○壬辰以奕霽爲興京副都統○癸巳楊岳斌奏臣於光緒十一年七月二十三日在泉州行次謹將找發各營餉項解繳軍裝辦理報銷大概情形繕摺奏明在案臣與營務處刑部主事楊秀寶副將石朝珩在廈督飭各營附輪赴漢採付水師提督臣彭楚漢興泉永道奎俊廣東候補道蔡文瀾極力照料始克迅速竣事初十日馳抵福州算結餉項臣前領湖南湖北江西三省協餉共銀十八萬三千兩又前大學士臣左宗棠銀八百兩兩江督臣曾國荃銀一千兩除提購鎗礮彈子火藥銅帽製辦軍裝等件以及開銷運費其餘銀兩自上年八月募勇起支發文武員弁薪水九月十九日起支發衛隊新兵三哨官弁勇夫口糧十月二十日起支發乾軍分統營務處及十三營官弁勇夫薪水口糧一律截至本年正月二十日止歸臣彙造報銷其自本年正月二十一起至七月八月止所有月需餉銀臣在閩省領放若干業與省會督後總局逐一算清結楚應歸閩省報銷至於軍裝一項據軍械所委員湖北候補同知劉度來稟稱直隸督臣李鴻章兩廣督臣張之洞協濟毛瑟鎗一千枝子五十萬粒前船政大臣張佩綸協濟小克虜伯礮十八尊藥彈車輪六百五十三箱兵部尙書臣彭玉麟協濟來復鎗七百枝銅帽五十萬顆分儲臺北軍械所廈門水師提督軍裝局均未動用前領兩江督臣曾國荃林明敦鎗三千枝子七十萬粒

意快鎗二十枝子一萬粒洋藥三百九十八桶銅帽四十萬顆鉛子三千斤湖北撫臣彭祖賢來復鎗二百枝土藥二百桶銅帽四萬九千顆又長江水師提臣李成謀湖南提臣李勝候補直隸州知州錢詔文及臣自購共來復鎗七百五十八枝前署安徽撫臣盧士杰協辦火藥一百桶銅帽二十萬顆鉛子二千斤閩浙督臣楊昌濬協濟來復鎗二百枝洋藥二十八桶銅帽二萬顆福建撫臣劉銘傳協濟云者土鎗三百枝又撥用泉州府知府徐震耀銅帽十萬顆統計林明敦鎗來復鎗云者土鎗四千四百五十八枝七月二十日交水師提臣彭楚漢黎意快鎗云者士等鎗四十六枝子一萬三千粒作爲操防之用其餘發給各營操演除炸壞遺失外實存四千一百枝又操演打靶用去林明敦鎗子不計粒火藥不計桶銅帽不計顆實存林明敦鎗子五十九萬四千三百粒火藥三百六十六桶銅帽四十四萬九千五百顆以及前製大刀牌刀鎗矛長矛藤牌藍布單夾帳棚並架金鑼銅鈴皮鼓噴吶銅號旗幟號衣鏟斧頭鐵鏃柴刀鋤頭馬蹄礮等件除損壞外其餘並前項軍械火藥概行咨明分繳臺北軍械所廈門水師提督軍裝局泉州府庫江西河口四處存儲備用前撤營勇經兩江督臣曾國荃會商長江水師提臣李成謀飭派南洋兵輪及由廈加雇商輪分起裝載赴漢昨接湖廣督臣裕祿電稱八月初旬陸續到鄂尙屬安靜當由裕祿與撫臣彭祖賢等俯念勞苦商同水師漢陽鎮總兵高光效派船照料並飭營後局按名給

船錢五百文資遣分途回里伏思臣此次領軍實賴各省督撫臣忠誠一心不分畛域馳撥軍需協助餉需藉壯聲威俾無顧慮臣渡臺日經前大學士臣左宗棠將軍臣穆圖善督臣楊昌濬撫臣劉銘傳等預籌經費得資迅速聞臣撤營復籌餉銀先行解厦故能克期遣撤不致延久虛糜臣在閩省現無棘手未完事件仰蒙 俞允撤營事竣回籍養親感激涕零擬於八月二十八日起程附乘登瀛輪船由海道回籍終養衰齡病母永戴 聖慈報聞○頒給運河韓莊閘 大王廟 湖神廟匾額○甲午諭莊親王載勛自本年正月以來迭次請假爲日過多殊屬不合著交宗人府議處嗣後王大臣等務當勤奮供職不得無故託疾乞假以重職守○諭領侍衛內大臣統轄三旗侍衛有稽察之責近來該大臣等於值班之期往往藉詞不到以致侍衛曠班無從稽查殊非慎重門禁之意嗣後該大臣等務當認真查察如有侍衛曠班即行嚴參該大臣等亦不准無故藉詞推班以重職守○諭本年山東沿河隄埝屢次復決小民顛沛流離情殊可憫迭經諭令該撫妥籌賑撫並特發內帑銀五萬兩以資接濟現在天氣嚴寒被水災區未經澆復者尙多各災民棲身無所餬口無資一切困苦情形倍堪軫念欽奉 慈福端佑庫廩昭豫莊誠皇太后懿旨著戶部於本年節應進宮內銀欸撥銀五萬兩發交陳士杰核實散放欽此該撫當仰體 聖慈軫念民艱之意遴派委員確查被災處所分別做放總期實惠均沾不得稍有弊混一面將

應辦冬賑事宜督飭各屬爲撫恤並將現辦情形隨時奏聞務使民困稍蘇用紓 慈系

十一月乙未朔劉錦棠奏查新疆著名荒瘠自經兵燹凋劫尤甚整頓撫綏悉關緊要而漢回雜處語言文字隔閡不通非習知其情無從求治故從前各項差委皆以隨營辦事人員擇能而任現值設省之始亦應酌立定章新疆北路實缺人員向由關內調補以後甘肅人員應准於新疆酌量委用擬請凡甘肅候補曾經引見驗看領照到省以及實缺人員如熟悉邊務調赴新疆差遣偶有人地相宜缺出准予分別請補調毋庸先行奏留若留甘尚未引見驗看先經隨營差擬即查取履歷分咨部籍無論正雜亦擇人地相宜之缺准其酌補其現在隨營人員內有分省補選並他省候補各員從事有年於邊務亦多熟悉擬請照依變通章程分別奏咨無論曾否委署地方均准留於甘肅新疆照章補署若向未 在營當差仍不得概援此章以示限制至請補各項員缺除南路經臣奏准仿照吉林章程由外揀補一次外北路添改各缺事同一律亦應先行由外揀補一次之後與北路屬有各缺一體援照雲貴甘肅變通章程請補統俟地方事務大定再照向例辦理以歸畫一惟新疆各缺例准俸滿調升內地原以鼓勵人才於邊缺特示優異現在新設各屬州縣有距甘省在七八千里以外者各該員捧檄馳驅不辭勞瘁若僅恃此二十餘屬以爲升調竊恐鼓勵之道有時而窮且此二十餘屬又多瘠苦尤不足以廣激勸查

新疆北路各缺例限三年五年分別俸滿南路程途更遠應請比照辦事文員三年期滿例均作爲三年俸滿屆期由藩司察其在任實心任事出具考語詳由撫臣驗看咨送甘省照例升用再實缺人員例准保送卓異甘肅州縣以上定例六員教佐二員烏魯木齊都統所屬同通雜職果有實係出色亦准保薦一員每屆計典新疆向由甘省辦理茲既改置行省增設郡縣可否從寬酌定額數分別核辦應請飭部併職示覆以便將來擇尤保薦如不得其人任缺毋濫倘有庸劣不職仍隨時查明參劾如此分別定章庶於變通之中仍寓慎重之意下部議奏○戊戌張曜奏臣於本年六月初一日准工部咨五月二十九日內閣奉 上諭京師內外城護城河自道光十三年興修以後迄今五十餘年未經挑挖河身日淤河面日窄每逢大雨水無所歸自應及時修濬以資宣洩著派張曜督率所部步隊十營及馮南斌二營查照該部所擬辦法將積淤挑除淨盡俾河道一律深通其有未盡事宜及臨時必須變通之處統由該營隨時隨地相度情形咨商該部辦理所有派出勇丁卽著張曜督飭各該管營官嚴加約束等因欽此欽遵鈔錄原奏咨行到 臣遵將欽天監擇定七月初七日卯時西南坤方動土興工日期具摺奏明在案馮南斌甘軍兩營將東才精銳四營先後到工並由神機營造撥鐵鉞鐵運土小車荆筐招笛木桶木柁各項器具到營經 臣督率統領甘軍記名提督翼鳳鎮總兵馮南斌統領豫軍精銳記名提督蔣東

程經張曜督率各營弁勇奮勉興修頗能嚴明約束尅日竣工辦理甚爲妥速廣西巡撫張曜著交部從優議敘張曜之子工部主事張端本加恩著賞給郎中歸本部候補甯夏鎮總兵馮南斌記名提督蔣東才孫金彪王連三劉世俊均著交部議敘並加恩各賞給大緞二匹以獎勞勩其餘出力員弁准由張曜擇尤酌保餘依議該部知道欽奉 慈禧端佑康頤昭豫莊誠壽恭欽獻崇熙皇太后諭旨此次出力員弁加恩著賞給銀一萬兩由神機營發給○慶裕等奏奴才等當大雨時行之先遵例會派委員 興京防禦景榮委官春麟候補同知達崇阿等前赴 永陵守護泊岸倘有衝刷卽行呈報去後嗣據該員與地方官等報稱六月十七日至二十五大連日大雨山水漲強河水泛溢兩岸平地水深數尺將 永陵明堂前草倉河泊岸由辰巳方兩空闊衝刷西岸長四丈五尺寬四五尺深三四尺不等橋色向有缺陷板橋邁西巳方南岸衝刷長二十一丈寬深均四五尺不等其內北岸衝倒柳樹一顆橫欹河面壅滯水勢致將橋色衝落大半又巳午方北岸衝刷長二十八丈寬深均四五尺不等午未方被水衝刷接連塌陷南岸計長三十丈寬三四尺深二三尺不等北岸柳樹衝倒一顆橫阻水勢衝開決口兩段東段長三丈寬八九尺深四五尺西段長六尺寬八九尺深四五尺不等橋色均各無存並衝中方南岸間有塌陷計長十丈寬四五尺深二三尺不等又因河水漫溢並由街道涌出之水匯流西下致將中間車道衝刷東西漆長一百

等奏戶部書吏黃夜逃跑請飭拿辦各摺片案關書吏畏罪潛逃坊役藉端搶掠虛實均應澈底根究著刑部傳集人證秉公研訊據實具奏○甲辰以姚文廣爲陝西陝安鎮總兵○烏里雅蘇臺參贊大臣惲明因病乞休允之○乙巳雲南地震○調張端卿爲安徽布政使盧士杰爲江西布政使○以祥麟爲烏里雅蘇臺參贊大臣○諭軍機大臣等翰林院侍講學士惲彥彬奏條陳山東治河事宜一摺著該部歸入徐致祥前奏一併妥議具奏○丙午吏部右侍郎張家驥因病乞休不允命賞假兩月○己酉紹祺奏昨因奉旨馳往庫倫查辦事件曾經隨摺聲明便道詳查各案情形再行奏辦在案查奴才衙門所轄阿勒泰軍臺共四十四站向分四段首段由察罕托羅海起至阿拉哈達止共十二站二段由布魯圖起至圖古里克止共十一站三段由穆爾喀順起至哈畢爾噶止共十一站四段由穆爾喀起至哈達圖止共十站此次奴才赴庫道經阿勒泰軍臺三十二站由寨爾烏蘇又道向東北卽屬庫倫所轄臺站故阿勒泰軍臺之第四段奴才並未身臨其境惟目觀前三段各站草萊密茂牲畜肥腴雨澤霑足爲近年所未有諒訪第四段暨附近各扎薩克旗牧場水草一律暢實足以上慰宸廑此今年口外蒙古地方年景豐足之實在情形也第奴才體察各臺蒙古生計仍未見饒裕推原其故實由幫臺官兵十數年之久並未到臺之所致也奴才揆臺細查由首段之求臺阿拉哈達起至第三段之畢里克庫共

五十五臺皆無制臺官兵案查舊制各臺向以二八合成遇有差徭制臺各旗應出烏拉駝馬八成本臺出烏拉駝馬二成自設立臺站以來歷有年所皆如是辦理此臺站之定章也自同治年間四子王旗首先託故藉詞西北軍興差役繁重濫自回旗厥後圖什業圖罕部落各旗亦皆效尤各逃回旗經前歷任都統等奏咨頻催雖有嚴降之旨均以被災爲詞抗不到臺以致本臺官兵獨力難支若非撥發帑項格外 恩施臺站幾乎間斷伏思蒙古部落世受 國恩當西北多事之秋正臣下効力之候卽或偶有偏災一時力有不逮何至數十年來盡是災荒其中不實不盡藉詞推諉情形顯而易見且奴才此次經過各臺查明履覓駝馬以舒臺力惟四子王旗地面駝馬履覓不出據本地蒙古人等說云四子王久有傳諭本地駝馬不准雇給臺站應差其所爲是何居心實不可解溯查蒙古部落向來禁止私墾 列聖屢降嚴諭實因蒙古地方人心渾樸不識不知自安游牧倘有不肖漢民雜處知識日開變故自起所以嚴禁者深意不盡在地畝間也乃四子王旗所屬部落傳聞私墾者十已八九蒙漢雜處幾難辨認其所以首先逃臺至今十餘年之久屢催罔應若論蒙古臣僕樸誠性生未必敢若是之抗違也現今西北大定各城驛路已通一切差徭均歸舊制正整頓臺站之時也所有各旗制臺官兵屢催仍不到臺若不嚴爲懲處何以肅郵政乎相應請 旨嚴爲曉諭統限以明春正月俱按舊制依限到臺如有正月內仍敢

藉詞推諉不到者著管站各衙門指名參奏立予嚴懲絕不寬貸庶幾臺站可以及時整頓以復舊制而免廢弛也奴才等職司其事不敢不將實在情形詳細陳請 旨辦理 上諭紹祺等奏請整頓臺站一摺據稱近來臺站疲累舊由幫臺官兵並不到臺以致木臺官兵獨力難支等語各旗幫臺官兵自應赴臺當差豈容託故不到致誤差徭著該都統嚴飭應行幫臺各旗嗣後務當確遵舊制依限到臺毋得遲誤倘再藉詞推諉著管站各衙門指名參奏該衙門知道○岑毓英奏查滇省入越之路以馬白關為要法人通商之道以蒙自縣為衝山馬白出越之安平安陸一路九日可達宣光然皆陸路為道羊腸不通舟楫由越屯鶴關溯三岐江沿流而上至宣光換小船可達河陽至此由陸路入滇五日可抵開化府城但宣光以上河身淺窄灘勢高陡舟不易行山屯鶴關三江口溯流而上紅江直通越之保勝對岸即消之河口再西溯則通新街蠻耗各地至此由陸路三日可至蒙自縣法人通商必出於此故馬白為入越之捷徑蒙自則為通商之要津兩路均應設立重防一旦有警敵出紅江一路則兵由馬白出越之安平安陸扼節司關大灘文盤以斷其尾敵向馬白則兵出紅江順流而下或由三猛出昭普州或由百林箐出龍傳皆可抵清波夏和以截其後路是蒙自與馬白兩路奇正相生有如常山之蛇擊首則尾應擊尾則首應也入關布防即於兩路密置重兵但念兵少則防疏兵多則餽費現在挑留一萬六千餘人編

爲三十營擬再挑選酌留萬人將來補入營伍以節餉需俟茲有定數再行請 旨辦理惟添設提鎮一層不能不悉心酌議馬白東南連接廣南府地界蒙自西南連接元江普州地界沿邊千有餘里皆與越南交錯蠻傑雜處山各險峻路不容騎敵固難行而伏莽不可不防若僅設專官一員勢難兼顧必須添設兩鎮而後外足以制敵內足以戢姦惟雲南綏制已設有六鎮似難再議加增伏查開化一鎮距馬白不及二百里臨元一鎮距蒙自亦僅一百四十里擬請每年於秋冬二季令開化鎮出駐馬白臨元鎮出駐蒙自縣督飭揀防春夏兩季煙瘴止深邊境無虞卽各回駐臨安開化府城而移開化中營游擊常駐馬白關添設後營游擊一員常駐開化府以開化左營都司分防交趾城右營都司分防古林菁石榴紅汛原設都司改爲守備並移一守備於長嶺岡其蒙自一面則添設前營游擊一員常駐蒙自縣移駐蒙自之右營都司分防窩頭水田右營守備分防高枝地惟簡錫錫廠實通三猛糧耗各路砂丁廠民不下數萬家漢夷雜採誠恐勾聯外匪滋生事端亟宜添設文武二員始足以資鎮靜查雙水塘同知暨臨元左營都司前經奏請移設曲江場現在地方安靖該處地段狹窄事亦甚簡原有曲江巡檢分防千總足資彈壓應請該同知移設箇箐廠並移臨元左營都司駐廠分防如此通盤籌畫則邊隘可無疏虞兩鎮分地扼防尤足以專責成而資警備至添設游擊兩員所費亦不甚多當與撫臣張凱嵩往返函商意

見相符惟添設開化後營游擊擬請照臨元中營游擊之制添設臨元前營游擊擬請照開化中營游擊之制所有守備千把外委兵丁照額增設其應設戰守兵丁擬以現在防勇充當將來裁撤邊防勇營卽以之頂補營伍如蒙 俞允請 旨敕部覈議施行奏入下部議奏尋經部議准如所請允之○曾國荃奏上年法事方棘臣布置沿海濱江各防營業經繪圖貼說陳奏在案本年夏秋欽奉 諭旨飭令汰弱留強裁營節餉臣於八九月間酌量次第裁撤昨已竣事旋因各屬呈報秋成歉薄民情不免動搖各路冬防極關緊要必需兵勇彈壓腹地豫防宵小竊發閭閻方有所恃以不恐臣卽檄調章合才四營回駐清江浦一帶揚州府屬請兵卽派王載駟馬融和各帶一營屯駐五臺山三汊河一帶江浦六合句容溧高上星河一帶請兵卽派易致中部下朱寶琳易三元金德恆所帶練兵三營分布各隘日夜梭巡至於江甯府郭百數十里城廂內外臣派督標中軍譚碧理所部三營朱公遠護軍一營分段巡邏而以凌陔廷選錄二營仍守下關各處嚴察徐州毗連山東時虞盜竊臣令蘆鳳高淮勇各營照舊屯駐均資得力所有江甯各郡腹地邊圍布置情形大概如此至於長江中江兩岸各隘口宜守嚴密以壯聲威練勁旅以備緩急入江要衝以吳淞口爲第一則有曹德慶淮勇六營朱式雲章其俊等湘勇二營章其俊所帶者卽合字前營也現經彭玉麟由粵咨送回江十一月十三日到甯比卽由甯載送吳淞口協防惟上海

爲華洋貿易之市日艱港及各隘口頭頭是道地方官紳士民懇懇留營運壓臣已批准留朱式雲所部之陳再益陳美仙二營分屯駐守晝夜嚴防至於江陰地方極關緊要則飭劉連捷所統南字四營會同張景春所統武毅春字准勇八營照常協力防守將礮位十尊日日操練一則可扼入長江之總路一則可守入蘇州之分路以期有備無患惟念鎮江關山象山都天廟南北兩岸礮位極多僅有劉連捷所部選鋒四營易致中之平字一營督標練兵二營分哨屯紮穩守礮臺未免兵力過單臨警尙須分營助守所有江蘇各郡濱江要隘臣布置情形大概如此查該各營月餉大半由江寧支放惟劉連捷所統之南字選鋒等營係臣上年奏請由江蘇安徽江西三省藩司每月協濟銀六千兩督標等營臣曾奏明由兩淮運司月協銀六千兩均蒙 聖慈俞允深賴三省四司竭力相助按月照解得以支持至今均已咨部有案此後仍當咨請札飭照前次奏定之案依舊按月協濟方不至於枵腹荷戈臣細查江南標兵歷經各前督臣挑選五營訓練多年在案卽今易致中所統之新兵五營是也此次就近訪察愈云兵之精華業已挑選入伍訓練未便再行多挑致令各武營無巡緝匪盜護送餉項之兵反多盜竊之案祇因地廣兵單隘口多而兵勇少如有警報在在堪虞臣惟有督飭各將領加緊操練精益求精請求礮位準頭穩紮穩守以期仰副 聖朝慎重地方之至意至於江蘇各路布置酌量裁留及一切辦法均係

撫臣衛榮光一手經理應由撫臣詳細陳奏得旨該部知道○庚戌大祀天於闕丘遺木格恭代行禮○壬子諭劉秉璋奏保舉人才一摺記名提督借補江西撫標右營游擊錢玉興著交部備處存記江西補用直隸州知州候補知縣徐春榮著該撫出具切實考語送部帶領引見○劉錦棠庫爾喀喇烏蘇設領隊大臣一員管理庫城精河土爾扈特游牧及屯田事宜設庫城糧員一員精河糧員一員由部揀派司理戶民糧務軍興以來糧員暫行由外委署查庫城為西路衝衢東距迪化城六百九十里距綏來城三百五十里西連伊犁至精河界二百五十里北通塔城至塔城界三百三十里幅輦闊地方扼要軍務初定游民商旅雜出其途兼有土爾扈特游牧民人稽查彈壓悉關緊要現在領隊員缺撤裁糧員既無地方之責竊恐難資鈿撫臣前奏設南北兩路驛站請將庫城精河兩處改設驛站該糧員經管嗣奉部咨覆准地方情形體制均與曩時迥殊自應變通籌辦改設官員以期有裨但欲隸歸後來則相距較遠鞭長莫及因查庫城舊設縣丞後改同知於乾隆四十八年裁改糧員擬請仿照舊制裁汰糧員仍改設庫爾喀喇烏蘇撫民直隸同知一員兼理事銜管理地方戶籍田賦刑案兼管土爾扈特游牧諸事宜並轄精河屬境精河西與伊犁接界相距二百二十里東接庫城界一百七十五里舊設典史後改糧員所管四驛轄境亦屬擬請裁撤員缺分設防驛糧巡檢一員管理戶糧驛站緝捕等事仍隸

同知管轄過事由同知核轉其同知仍隸道屬以專責成又鎮道葛特喀喇巴爾噶遜糧員一員地在迪化南一百八十里原管戶民本由迪化分撥兵糈後員缺久懸戶民均係由州經營直前奏請升迪化直隸州爲迪化府增迪化縣爲附郭首縣該處距城較近一切事宜縣中自能兼顧其原設糧員一缺亦應裁汰庫城精河原額戶民屯兵及徵納額糧房利園租等項均歷有成案可考現在戶口凋零兵屯未復一切徵收雖屬寥寥然爲撫綏彈壓起見似亦因時制宜莫要於此官制既定得人而理數年之後自必日有起色其改設各官應定爲何項缺分俟設定後再行擬議辦理仍懇照吉林新設各缺酌補一次成案由外先行揀補一次下部議奏○廣東水師提督曹克忠因病乞休允之賞食全俸○以方耀爲廣東水師提督○吏部右侍郎張家驥卒予祭葬卹銀命貝勒載漪前往奠醴賞其子有培舉人○癸丑李鴻章等奏內閣鈔出江西學政陳寶琛奏請將先儒黃宗義廟旌武從祀 文廟一摺光緒十年四月二十二日軍機大臣奉 旨禮部議奏欽此欽遵到部等查同治二年禮部奏准附祀 廟廷祀典至距咸豐十年閏三月大學士軍機大臣遵 旨議定嗣後從祀 文廟應以闡明聖學傳授道統爲斷特恐各省官紳未能深悉歷次所奉 諭旨紛紛陳請從祀殊非慎重之道應請 飭下直省督撫學政恪遵十年定章不得濫請從祀 文廟並不准援案如爲 文廟中必應從祀之先賢先儒方准該督撫會

同學政詳加考核明請 旨並將其人生平著述事蹟送部查核其 欽定書籍中引用若干條論贊若干條先儒中引用若干條論贊若干條一併詳細造冊送部不得僅據空言率行陳請均請 飭下大學士九卿國子監會同禮部議奏等因在案茲據原奏內稱先儒黃宗羲顧炎武皆以勝朝之遺獻齋爲昭代之儒宗家傳忠孝學有淵源而生當明季經術荒蕪漢註唐疏棄置不談宗義倡之於前炎武繼之於後承學之士始習百經且宗羲矯良知之末派以慎獨爲歸炎武辨陸王之幾微以紫陽爲的而又能抉許鄭之精判賈孔之談不以抱殘守缺爲止境尤無考據家之流弊 欽定四庫全書總目采宗羲之書多至十有四種采炎武之書多至二十二種提要謂宗羲推究事理不爲空疏無用之談炎武博覽通貫學有根柢 國史儒林炎武冠其首宗羲接其列是其生平久經論定以之附祀春秋庶幾無慚崇報等語當經 臣部行文江蘇浙江各巡撫咨取書籍茲於本年八月間據浙江巡撫將黃宗羲所著書九種顧炎武所著書五種咨送前來 臣等謹按 欽定四庫全書提要於宗羲所著孟子師說謂其多闡發良知之旨然推究事理亦不盡主姚江之說於易學象數論謂其究心象數非但據理空談惟河圖洛書泥宋薛季宣之說矯枉過直於深衣考謂其變亂舊詁多所乖謬於王程學案謂其盛談伊川姚江之根柢終在於明儒學案謂其生於姚江欲抑王尊薛則不敢欲抑薛尊王則不敢故於薛之徒陽爲引重而陰

致微詞於王之徒外事擊排而中存調護猶有勝國門戶之餘風此外如今水經各種大抵謂其搜羅考據有密有疏於炎武所著左傳杜解補正謂其多得左氏之意能彌杜解闕失於日知錄謂爲積三十餘年而爲一書精力所注博贖而能通貫然炎武生於明末喜談經世之務其說或迂而難行或悞而過銳潘耒作序乃盛稱其經濟以考據精詳爲末務殆非篤論於天下郡國利病書謂其采摭舊文同異兼收間有矛盾編次亦絕無體例此外如音學石經各種大抵謂其考核精確亦有附會泥古之處是該故儒著作早經 高宗純皇帝 鑒定於 四庫全書中分別點取並於提要中辨其純駁是非 聖謨久垂定論又道光九年奉 上諭禮部議准御史牛鑑奏請以李容從祀 文廟一摺先儒升祔學宮祀典至鉅必其人學術精純經綸卓越方可俎豆馨香用昭崇報若僅著述家言闡明心性未有躬行實踐超越等倫列祀鄉賢已足彰褒旌之義豈宜升祔 廟廷稍滋冒濫綜核李容生平學行雖足爲闡黨矜式然似此者亦不乏人何能盡登兩廡該部請如該御史所奏准其從祀 文廟之處著毋庸議欽此 天語煌煌允宜遵守今黃宗羲顧炎武 國史儒林傳載其生平學行亦僅著述家言未有躬行實踐似不足當闡明聖學傳授道統之目 臣等公同商酌該學政請將黃宗羲顧炎武從祀 文廟之處擬毋庸議惟該故儒等志節矯然博學通貫足爲闡黨矜式應准其入祀鄉賢以彰 褒旌潘祖蔭等奏 臣等准禮部

咨以前任江西學政陳寶琛奏請以故儒黃宗羲顧炎武從祀 文廟欽奉 諭旨命臣等赴內閣會議
臣等謹按從祀之典古無所見禮記文王世子凡學春官釋奠於其先師秋冬亦如之又凡始立學必先
釋奠於先聖先師鄭元注先聖周公若孔子先師漢禮有高堂生樂有制氏詩有毛公書有伏生億可以
爲之此爲言從祀之始漢魏以還闕焉未舉唐貞觀二十二年詔左邱明等總二十二座春秋二仲行釋
奠之禮繼遂以周公配成王而以孔子爲先聖此爲定從祀之始推原事始蓋本樂祖釋宗之義凡從祀
先聖者皆博士弟子所從承學轉相授受之本師沒則各以其師附祀所謂將習其道必各祭其師證之
古語斯爲最合濂洛諸賢挺生宋代卓然爲世大師元明以來迭爲增祀亦因士習其教故以崇德爲報
功追契始初並非相悖厥後請祀紛紛無關茲義我 朝禮教昌明勛循古法道光九年 特旨不准李
容從祀蓋懼空談心性者冒越其間實與唐人創始之心若合符節 等並遵其義近懼 聖謨謹核黃
宗羲顧炎武之生平及素所服習該故儒之遺書竊謂宗羲炎武皆有傳經之功衛道之力崇正遏邪之
實效敢舉其合於從祀之讀者條列上 聞不厭煩瀆一 一爲我 皇太后 皇上陳之我 朝文治昌
明經師輩出諸經各有專家各有疏義精研小學淹貫羣經者尤難指數蓋自三代以來經學至 國朝
而極盛而上溯淵源並推至黃宗羲顧炎武而上卽至辨書古文之僞發古韻之微深通天算博稽地理

凡樸學之專門皆該一儒之遺緒迄今蓋述炳在人竇傳授既繁淵源有在是凡讀其講習其言者皆以該二儒爲轉相授受之本師故道光年間京朝各官特建顧炎武祠於京師春秋祀事直省學人咸爲執事迄今不絕蓋亦未有不之創舉矣臣等以爲人心所在卽定論所應各省名臣達宦實不乏人何以偏偏獨祀該故儒此卽所謂將習其道必各祭其師皆發於人心之不自覺也等語以爲黃宗義顧炎武當從祀者此其一然僅合古誼而相乖今制也等亦不敢妄請伏讀道光九年 聖訓先儒升祀學宮祀典至鉅必其人學術精純經綸卓越方可以祖豆馨香用昭崇報又咸豐十年議准從祀先儒應以闡明聖學傳授道統爲斷臣等查黃宗義編定明儒學案經二百年學術升降之原會通融貫雖出自叢山而於姚江宗派痛予斥絕故河東姚江兩得其正創修宋元學案條分派別只斥邪而扶正不伐異而黨同其稱朱子謂致廣大盡精微綜羅百代推抱可云極至顧炎武不立講學之名而有蹈道之實其論學之行謂聖人之道曰博學於文曰行己有恥又謂今之理學禪學也不取之論語五經而但資之語錄不知本矣故所學一以肥馬精實而無腐張之氣門戶之私至推崇朱子其所著目知錄皆可覆案夫亦是

以當學術精純之目矣然猶未證諸實效也明季心學盛行顏山農何心隱李贄之徒標目狂禪蕩無禮法細行不謹束書不觀學術既壞國運隨之黃宗義排斥其根株顧炎武痛絕其支蔓自二儒興而禪學

息矣禪學息而樸學起矣絕續之交固山景運之隆亦該故儒教澤之力所謂闡明聖學傳授道統者非歟至於經綸卓越之稱該二儒皆以經濟交推特以身丁家運心在勝同自不能奮跡曷期各抒偉略如顧炎武日知錄所載正定之轄五州二十七縣蘇州之轄一州七縣而蘇州之糧三百三萬八千石正定止一十萬石王者則壤成賦豈有大小輕重之不同若此者後之王者審形勢以制郡縣則土田以起徵科乃平天下之先務此卽列聖減定蘇松浮糧及增設直隸州改併州縣之議其他鑒明人之失開我朝之法者不可枚舉而寧域志宅京記諸書具有深意尤非輿地之學蓋與宗義明夷訪錄同爲經濟家必資之書矣夫空言經濟能欺一時而不能垂之後世至流傳二百餘年而讀者猶思取法則其非空言經濟可知矣臣等準之今制以爲黃宗羲顧炎武當從祀者又其一凡若此而無列聖欽定之評猶未敢遽定也黃宗羲顧炎武經四庫著錄之書原案已經詳列提要褒許之語學者無不周知臣等辨補復爲引敘惟欽定國史儒林傳於黃宗羲傳內稱其上下古今穿穴擊首自大文地志九流百家之教無不精研又稱宗羲之學出於戴山固誠意慎獨之說縝密平實於顧炎武傳內謂其敏華就實扶弊救衰又謂國朝學有根柢以炎武爲最至爲宗特筆謂其在華陰於靈臺觀側建朱子祠則驟然以紫陽嫡派歸之矣如謂四庫提要中有一二糾正之語遂卽疑議此正不然提要爲敘錄之體意在解

題係專爲一書而發非是統論全書譬如詩有正變誓有真僞而至今並誓爲經未嘗有所偏廢違者無
論矣臣等卽就 國朝之得從祀者言之如陸世儀思辨錄提要則謂其不免迂闊之失陸隴其問學錄
提要則謂其過於主持孫奇逢觀書近指提要則謂其不免高明之病至張伯行所著理學各書斥入儒
家存目一字不登向使當時禮部必據提要之辭以爲論定詎儒之案卽陸世儀等亦不應俎豆於兩廡
矣湯斌 國朝從祀之儒之至純至正者也而推黃宗羲之詞曰黃先生論學如大禹導水導山脈絡分
明吾黨之斗杓至其與顧炎武書謂道之衰久矣得大力闡明豈非斯人之幸茲數語者苟非宗羲炎武
孰敢當此苟非湯斌深知宗羲炎武亦何能發明況湯斌在史館得黃宗羲一書謂宋史之道學傳乃元
人之陋遂示於衆而卽去之其志同道合略見也 聖君之評如彼賢臣之評如此殆幾乎無可致疑矣
此臣等準之於成憲以爲黃宗羲顧炎武當從祀者又其一以上三端容有未盡之語而初無溢美之詞
俎豆馨香洵無愧色乃者禮部具稿力從駁議臣等實不敢苟立異同亦不敢隨事附和卽如陳寶琛疏
中有宗羲倡於前炎武繼於後二語查二人生既同時初無先後之分學又異派更無倡繼之說該學政
措詞偶誤臣等亦不曲爲之諱然因此而遂謂其不明學術因並斥其所請之人則固不可也臣等稽之
古翻求之輿論以爲該故儒之從祀實順人心而不違成例况我 皇上輯熙典學正當審理學術以風

示天下將因以求所謂師以賢得民儒以道得民者以爲平治天下之本是該故儒從祀之與似亦繫乎時政而非徒滋議論者已臣等公同商酌擬請 旨將黃宗羲顧炎武從祀 文廟倘因祀典重大未能驟定應請 旨飭下大學士六部九卿翰詹科道再行詳議具奏 上諭前因陳寶琛奏請黃宗羲顧炎武從祀 文廟當令禮部議奏本日據該部會同大學士九卿具奏請毋庸從祀又據潘祖蔭等另奏請旨准行各一摺著大學士六部九卿翰詹科道再行詳議具奏○劉秉璋奏請永順縣丞改爲永仙分防縣丞金華協中軍都司改爲巡防都司移設八保山允之○以李鴻藻爲吏部右侍郎周家楣署吏部左侍郎○以方友升爲廣東南韶鎮總兵○乙卯諭前據太常寺少卿徐致祥翰林院侍講學士惲彥彬先後陳奏山東河務均經諭令該部會議覆奏請派大臣周歷履勘各摺片黃河自銅瓦廂決口後迄今三十餘年河身淤墊日高急溜旁趨年年漫決朝廷不惜帑項規畫宣防所有治河之法不外堵築堤埝疏濬淤墊設法分流三端迭經巨工陳奏疆吏籌議衆說紛紜迄無定論東省濱河州縣水患頻仍時屢膏旰本年潰決之趙莊驢溝兩口至今尚未堵合亟應審察地勢詳細釐度定一至當不易之策方足弭河患而衛民生前經諭令張曜查勘山東河道卽著馳驛前往應行隨帶人員詳慎遴選准其一併馳驛該撫當親歷上下游逐加查看究竟黃河入海之路因勢利導應由何道爲宜其修築疏導各節並著

詳加籌度博採羣言折衷一是將如何變通辦理並約請錢糧數目先行奏聞候旨遵行○前前翰林院侍講學士李文田仍在 南洋房行走○以張煦爲廣東布政使○岑毓英奏光緒十一年九月初三日接准吏部咨查宣光一案出力人員原保軍內暨隨該員等籌運軍械糧餉督隊陷陣掃蕩賊營擒斬首要所保各員並非均係接仗獲勝應行分別給獎惟軍內未將何員所著何項勞績分晰聲敘礙難遵照外洋接仗獲勝章程一律辦理除將原保清單暫行存案外相應請 旨飭下該督詳細查明此案文武各員係著何項勞績分晰擬奏到日再行遵照定章分別核辦等因咨行到臣伏查臣前保獎關外前敵接仗獲勝在軍出力人員業經嚴加核實不稍寬假因將後路接應及關內運籌餉械採辦糧米各項出力人員請 旨另案辦理原以分別何員著何項勞績未許一概從同惟上年十二月圍攻越南宣光掃蕩賊營逼城而壘直至今年正月將士日夕輪番攻戰賊城陷陣斬將登陴並無片刻休暇三十六晝夜苦與敵持餉械之需急如星火而宣光離清界千有餘里霧霖瘴氣中人輒死共計出關在事文武員弁前後瘞故五百餘員兵勇瘞故四千餘名毒要之區無人不畏其已邀保獎而瘞故者固屬可矜力濟危局幸獲生還者尤宜體恤茲准部咨飭令將何員何項勞績分晰聲敘等因查協同武員督隊陷陣掃蕩賊營者知府張勝慶等三十四員名其親運餉械屢赴前敵出盡煙瘴雨之鄉入對壘交鋒之地不顧

身命共濟艱危者道員陳席珍等十八員名核與尋常轉運勞績不同前奉 諭旨飭將圍攻直光出力

人員一併保獎仰見 朝廷體念微勞有加無已是以將親赴前敵轉運出力各員彙入圍攻直光接仗

獲勝人員單內從優請獎候 旨施恩仰蒙 俞准而同知潘德繼縣丞柏昇巡檢李寶蕃於保獎後旋

卽瘵發身故業經奏請議卹在案在部臣分晰核辦自係循名實實惟該員入險濟危原與接仗出力各

員實同而名異合無仰懇 天恩俯准將道員陳席珍等十八員名並督隊陷陣之知府張勝嚴丁彥等

三十四員名 勅部准照外洋接仗獲勝章程一律辦理以昭激勸之處出自 逾格鴻慈允之○丙辰

諭湖南學政曹鴻勛奏援案保薦教職並保經明行修之士懇恩獎勵等語六品銜升用知縣桃源縣教

諭嚴家壘著交部議敘長沙府教授祝松雲著賞加五品銜所請將廩生成克襄蕭榮昌段復昌援照成

案以教職選用之處著該部議奏○諭兵部等衙門奏遵議處分一摺庫倫辦事大臣桂祥著照部議卽

行革職不准留營蒙古庫倫辦事大臣那遜紳克圖應得降二級留任照例罰扎薩克俸三年及協領音

德泰筆帖式松陵應降二級留任處分均著准其抵銷○調色楞額爲庫倫軍印辦事大臣以文碩爲駐

藏辦事大臣○吳元炳奏卓勝防軍積勞年久懇准獎敘得 旨防營向無保案姑念該軍遇事出力積

勞年久所有卓勝營勇丁著該撫查明酌量給賞以示鼓勵其統帶員弁著核實酌保數員勿稍冒濫嗣

後不得援以爲例○丁巳諭都察院奏山東生員戴慕鸞等遣抱呈訴私決河堤贖上殃民等情一摺據稱山東金鄉縣城北柳河決口歷經籌款堵築現被監生李殿珠等串同汛官委員將決口仍留未塞復挖開十餘口淹沒成災戴慕鸞等呈請勸辦復被句串膠詳等語案關決堤殃民虛實亟宜根究著陳士杰飭屬確查訊明具奏抱告民人王兆齡該部照例解往備贖○戊午 上詣 大高殿祈雪○辛酉欽奉 慈禧端佑康頤昭豫莊誠皇太后懿旨前於咸豐年間因辦理軍務需餉甚鉅將王公官員及兵丁等俸餉減成放給撙節度支以濟要需原屬一時權宜之計現在軍務敕平朝廷體恤臣僕慮念時殷加恩著將王公及在京官員俸銀京師旗綠各營兵丁餉銀並太監錢糧自光緒十二年正月一起一律仍照舊制全數放給至 陵寢盛京及各省官員兵丁減成俸餉著俟庫款稍裕由戶部奏明請旨其自減成以後各旗營添支辦公款項本爲舊制所無今既加放全餉應如何分別裁減之處著該部卽行妥議具奏○諭軍機大臣等曾紀鴻電奏已悉咨英責其食言該國若何答復緬甸貢之據已由總署電知該侍郎卽著力持正論與之辨難該國前有熟商之語能否踐言卽電聞○英減緬甸○癸亥諭朕欽奉 慈禧端佑康頤昭豫莊誠皇太后懿旨將京師旗綠各營兵丁餉銀照舊全數放給仰惟 聖慈體恤兵艱無微不至第念各營積弊甚多如兵丁病故不報以及冒領重支額外虛糜種種弊端不可枚舉亟應稽

查整頓以昭核實所有京師旗營一切宿弊著該都統副都統認真盤剝並隨時查察倘參佐領等有徇隱欺飾情弊卽著指名嚴參從重懲辦決不寬貸○諭軍機大臣等英人現併緬甸恐狡焉思啟之心因此益甚四川邊防著丁寶楨密籌熟計先事圖維一切情形隨時探明具奏將此諭令知之○以恩承爲大學士管理理藩院事務閻敬銘爲大學士管理戶部事務○命福銀以戶部尙書協辦大學士張之萬以刑部尙書協辦大學士○調崇綺爲吏部尙書福銀爲戶部尙書以麟書爲工部尙書○調翁同龢爲戶部尙書以潘祖蔭爲工部尙書

臣朱壽朋敬編

臣章圭豫恭校

十二月乙丑朔以許庚身署兵部尚書○諭恩承行走班次著在額勒和布之次閱敬銘行走班次著在恩承之次○謙禧奏奴才接管卷內同治三年十二月間 欽差大臣額勒和布等奏結查辦土默特貝勒旗老頭會滋事一案章程內開該旗私開地畝租項統令歸公以補公用嗣經理藩院覆奏議令飭知該旗將私開牧場造具坐落四至清冊就近呈報都統盟長各派委員將所有典賣地畝會同秉公先行一律查清仍體察現在蒙民交涉情形詳慎核定其已經招民租種各地畝亦即逐一查清所有租項若干可否統歸公用通盤籌畫一併奏明辦理並飭妥為立定章程令窮蒙餬口有資等因奉 旨依議欽此欽遵行知在案迭經該旗呈請查丈並經理藩院行催歷前任都統均因該旗未經造送地畝四至清冊是以未及清查茲據該旗將此項地畝坐落四至造具清冊呈請飭派委員前往查丈前來奴才查此案有關蒙民生計自畿以來已經延擱二十餘年該旗既造具四至清冊未便再事稽延自應委員查丈以免復起爭端第此項地畝查丈歸公是否足敷該旗公用通盤籌畫定立章程在在均關緊要辦理稍

有未協必又起家民爭競之端非精明幹練有爲之員難期妥籌查奴才衙門辦事司員理藩院員外郎
清詳明幹有爲熟悉蒙古情形自應派令前往會查以期妥籌而昭經久俟一律查清安定經久章程奏
請辦理報聞○內寅諭樞圖營奏籌備銀五萬兩解交海軍衙門應用等語樞圖營籌備要需洵屬急公
著賞還巴圖魯名號並交部議敘○丁卯頒給熱河豐寧縣 關帝廟赫山 龍王廟元寶山 龍王廟
匾額○戊辰前任鑲藍旗蒙古都統穆隆阿卒予祭葬○己巳 上詣 奉先殿 壽皇殿行禮○辛未
上幸西廠閱賦跋○賞給順天府資善堂煮賑米石○裝蔭森奏福建船廠造成鏡清快船下水懇請
擇尤獎勵得 旨此項輪船著俟試洋後如果駕駛得力毫無流弊再將出力人員擇尤請獎○壬申
上詣 大高殿祈雪○甲戌諭都察院奏工部主事江孝詒以伊父已故署廣西提督江忠義墳墓被掘
案關冤沉等詞遣抱赴該衙門呈訴控告案關廢塚久未辦結著李秉衡親提全案人證嚴訊確供按律
懲辦其未獲各犯並飭屬嚴拿務獲訊究抱告鄧升該部照例解往備質○吏部尚書崇綺因病乞休不
允命賞假一月以烏拉喜崇阿署吏部尚書○命戶部左侍郎孫詒經在毓慶宮行走○調故彭年爲陝
西按察使溫忠勳爲湖北按察使○乙亥以汪鳴鑾爲內閣學士○丙子諭已革副都統景瑞著賞給副
都統銜交海軍衙門差遣委用○諭楊昌濬奏添設臺北道不如添設藩司係爲因地制宜起見自可准

行臺雖設行省必須與福建連成一氣如甘肅新疆之制庶可內外相維蓋詳細會商奏明辦理○撫恤琉球遭風難民○丁丑欽奉 慈禧端佑康頤昭豫莊誠皇太后懿旨本日據神機營王大臣奏抽調旗兵史番教練並節省銀兩作為訓練經費各摺片已依議行矣八旗向稱勁旅自俸餉減成後久未認真操練現已降旨將俸餉全數放給該官兵等若不激發天良勤加練習必至糜餉辜恩毫無實濟該王大臣擬於八旗滿洲蒙古漢軍驍騎營分別人數按月調取更換演習所籌甚是即著據派專操大臣各帶所管得力官弁切實訓練毋得視為具文其餘旗綠各營亦當掃除積習由各該管官隨時督飭精練總期一兵得一兵之用此次全放俸餉係為體恤兵丁力顧根本起見各該管大臣務當仰體朝廷實事求是之意振刷精神實力整頓以期營務日有起色鉅帑不至虛糜勿得日久懈生致干咎戾○諭軍機大臣等法辦北圻費手又避藥地之辱取會止在兩難我若踰約而爭彼或藉罷讓退去則衅端終歸未了該大臣等守定改正二字辨論甚是惟須相機進退但屬越界之地其多寡遠近不必過於爭執總以按約速了勿令藉端生衅為主並將此意電知周德潤等一體遵照以免參差關切宗療故可憫照請賜卹俟奏到降旨法蘭亭巴律之去有無別故浦使繙譯尙有何人均電覆○諭朝廷制節謹度各項用款總以核實為主內務府承辦及傳辦各事屢經醇醇詰誠不准稍有虛冒乃積習相沿罔知悛改辦理要

務往往將工料銀兩飽稅開報其中浮冒不知凡幾每遇一差鉅營贖徇上下相蒙其於傳辦之件有意遲延藉端漁利不實不盡積弊極多甚至旬通織造等衙門胥吏轉騰混虛糜帑項實堪痛恨著總管內務府大臣破除情面務將種種弊端切實禁止並嚴定章程迅速覆奏以資遵守經此次訓諭之後如再有前項情事一經查出定惟該大臣等是問○諭前據戶部奏八旗所造兵丁餉冊舛錯浮領將本年二月至九月逐名追查當經降旨允准茲據該部查明旗兵浮領庫項情形詳悉覆陳既已查有端倪自應核對確實著各旗都統等按照戶部咨查各款速即自行查明將數目花名逐一分晰咨覆該部分別核議奏明辦理餘依議○戊寅以額勒和布爲武英殿大學士恩承爲體仁閣大學士閔敬銘爲東閣大學士○以徐鼎銘爲左副都御史○己卯雪○諭有人奏理藩院司員平日於蒙文多未肄習每遇蒙古要職等事任憑書吏藉端勒索以致弊費叢生殊屬不成事體即著理藩院堂官隨時稽察認真整頓督飭司員等勤習公事將書吏勒索混種弊端嚴行禁絕嗣後如再查有前項情事即行從嚴參辦勿稍徇隱用副清釐積弊體恤藩部至意○庚辰兵部奏雲貴總督岑毓英因剿辦宣光臨洮大獲勝仗奉旨交部從優議敘臣等公同酌擬應請將雲貴總督岑毓英一等軍功從優議敘例給予軍功加三級九之○辛巳欽奉 慈禧端佑康頤昭豫莊誠皇太后懿旨侍那黃體芳奏大臣會辦海軍恐多貽誤

請電諭使臣遍歸練師一摺本年創立海軍事關重大特派醇親王總理一切事宜李鴻章卓著戰功閱歷已深諭令會同辦理原恐操練巡閱諸事李鴻章一人未能兼顧遴派曾紀澤瀾辦所有一切機宜均山海軍衙門奏聞請旨辦理朝廷於此事審思熟慮業經全局通籌况岷陟之權操之自上豈臣下所能意為進退海軍開辦伊始該侍郎輒請開去李鴻章會辦差使並諭飭曾紀澤瀾歸練師改敘更張迹近亂政黃體芳著交部議處○諭都察院所題註冊錯誤之吏部堂司各官察議一本恩承徐桐松濂許應際熙敬仍著酌議餘依議其齋戒期內呈遞刑名處分摺件察議一本恩承徐桐松濂熙敬連前罰條四箇月李鴻藻罰條三箇月俱著註於紀錄抵銷餘依議○壬午 上諭 大高廣報謝○調王嵩齡為四川布政使易佩紳為江蘇布政使○以續昌為內閣學士○慶祥奏各部院招募書吏所以檢檔冊供役使也而書吏之名有二一曰貼寫一曰經承貼寫者學習例案之謂經承則一司文移案件俱出其手故於充役時必取其保結並姓名年歲籍貫立冊備核俟五年役滿即由各衙門移咨都察院令五城司坊押令回籍毋許逗留立法不為不嚴防弊不為不密乃書吏巧於舞弊視保結為具文直有充役十數年而不更替者甚至盤踞 京師捏造偽籍以成其欺飾之私實屬不成事體查各部院設立司務等官專司管轄吏役果能剔奸懲弊某也有結某也無結某也役滿不難條分縷晰予以重懲而書吏以朦混當

之亦遂以朦混應之無怪乎書吏之惑不畏法也相應請 旨飭下部院堂官認真整頓並責成司務等官於書吏已取有保結者按照役滿日期押令回籍未取有保結者即取其切實保結並姓名年歲籍貫暨充役日期彙爲清冊移咨都察院按季查核倘仍前朦混一經發覺即將該書吏照齊吏治罪並將該管官照失於覺察之例議處庶弊端爲之一清 上諭御史廖祥奏部院書吏朦混當差請飭稽查一摺各部院招募書吏藉供役使例應取具保結並於役滿時押令回籍立法本極嚴密若如所奏該書吏等巧於舞弊朦混濫充甚至盤踞京師捏造僞籍竊屬不成事體著各部院堂官認真整頓如查有前項情事卽著從嚴懲辦○癸未 上詣 北海永安寺拈香○諭軍機大臣等有人奏豫省州縣諱盜成風各處搶劫之案層見迭出率皆消滅彌縫請飭認真整頓等語著邊寶泉查明切實具奏○諭軍機大臣等界務業經開議張之洞三月之說故作紆遲恐生枝節岑毓英河內海陽之議亦在約外尤不可自我而發致貽口實鄧承修等當懷遵前旨將改正事宜按約速辦並電知周德潤等一體遵行○諭有人奏直隸鹽山縣知縣柳銘辦事荒謬捕務廢弛請飭查參等語著李鴻章按照所參各節確切查明據實具奏○乙酉岑毓英奏 查英人占踞緬甸專其利法人頗相齟齬竊爾無此信英藉中國之力招東擊西一以挫英人於緬甸一以驅游勇於越南彼乃得據越分緬兩收其利狡諂之謀難逃 聖明洞鑒復查

大理府爲滇省連西奧區不與緬甸交界其出緬道路一西行八站出永昌府一南行六站出順寧府始與緬甸接壤永昌府屬之騰越龍陵兩屬順寧府屬之雲州緬寧縣距緬較近而騰越龍尤爲出緬衝途外人窺伺必由此路但其間多陽野山自龍陵以遠順寧緬寧普洱思茅各府屬縣邊地皆有土司間隔惟與永昌順寧交界之班隴地方不歸中緬管轄爲迤西逆回餘黨藏垢之所英人既有覬覦內地之志則旬結煽惑自在意中防範尤宜加緊現檄飭各屬將現有之兵并招集鄉團卡練扼守要地復派總兵丁棟前往布置惟兵力尙單應俟丁棟查看情形稟報到日再行陸續添布前遣都司杜秉陽等分往野山招諭茲據稟稱此輩野人非啗之以厚利不足以結其心亦經密飭該都司等相機辦理至大理礦務前因招商開採折耗甚多集股遂不易易惟有與撫臣張凱嵩極力設法招集並籌儲官本悉心開辦以免外人垂涎頃據騰越鎮總兵朱洪章騰越屬同知陳宗海稟光緒十一年十二月初十日英官阿太雜遺緬人彌投緬字文書一帖到騰當經譯出大意謂英已據緬華商等仍應照常往緬貿易英人亦如緬人當日關照仍循舊規各守疆界往來通商等語並據緬人面稱泰新街緬官密心蘊直島密屬轉稟英人貪得無厭吞噬緬國緬官等強弱不敵祇得詐降近日猛拱蘊及瑞波稔祚各土司興兵鬪復英人分兵防堵水陸消息不通本欲具稟懇乞發兵進討又恐英人知覺受害儻蒙 天朝垂憫屬國興師問罪

大兵到境緬官當先獻新街又轉據畢人張成濂報稱探得瓦城各處英兵屢被緬人誘殺由緬都至新街緬官與猛拱蘊稔各土司聯成一氣均已叛英英人首尾難顧其現紮新街英兵五百人英人祇有百人餘皆印度及土夫之人各等情前來臣查疊據探報英人甫至新街即欲修路上通變尋並招集野人之曾經入教者紮近新街各處居心實不可測現因緬人多叛英兵分回瓦城駐守自顧不遑乃輒投文騰越乞請守界通商其意實恐中國興師問罪足以乘其敝困特為和解之策以便專意經營緬甸無所掣肘惟近日法人由粵界文淵地方分兵至牧馬充封驅逐游勇該游勇數萬逼處滇邊開廣接界之地南路邊防尤為喫重分兵則防疏添兵則餉絀其滇緬一面只有暫飭朱洪章丁槐等督同各屬文武員弁嚴守疆界稽察出入並飭防兵密緝姦宄以遏亂萌應否准聽華商照常往緬貿易之處相應請旨勅下總理各國通商事務衙門嚴飭邊除將騰越遞到譯出英人齎投緬字文書鈔錄咨呈軍機處暨總理衙門查照外所有覆陳滇緬邊務情形及英人齎投文書緣由恭摺具陳 上諭此次英緬搆兵實由緬不量力自取挫敗惟究係中國朝貢之邦未便置之不問疊諭曾紀澤與英外部辯論現據曾紀澤電信有英允另立緬王管教不管政照舊進獻中國等語是英雖逞志於緬而於中華尚思修好或可乘機利導以弭兵端○劉錦棠奏 於光緒八年七月間奏請將阿奇木等伯克裁去仍准戴用頂翎經

理藩院遵 旨議覆各城去伯克體制是否合宜未敢率行議准請 飭再行體察情形悉心妥議覆
奏嗣於委署新設南路道羅州縣各官摺內聲明擬將伯克分撥為吏戶禮兵刑工各書復經部議係
為隨時變通期於兩有裨益起見自應准如所請惟伯克各有專責從未議及吏章一日驟加增改回民
能否相安似難遽計請 飭酌度情形妥議核辦等因先後奏奉 諭旨依議欽此欽遵各在案竊惟回
疆民事從前委之阿奇木伯克等官原以約束部眾乃該回目等往往倚權藉勢魚肉鄉民為所欲為毫
無顧忌纏回語言文字隔閡不通民怨沸騰而下情無由上達繼遭安夷之變該回目等苛酷尤甚橫徵
暴斂勝削靡遺民命不絕如縷幸賴 皇威遐暢 天戈所指莫不聞風披靡舉二萬餘里之疆土還隸
版圖使邊民重覩天日 曠年規復南疆每於進克一城即商前督臣左宗棠揀員設局辦理醫後招
集流亡籌給牛籽農具疏濬溝渠使之盡力耕作輕徭薄賦與民休息數年以來荒蕪盡闢戶口日增地
方漸有起色具大小伯克頗缺雖亦揀委署理究竟地方應辦事宜均責成各該局員察看情形稟請遵
辦但藉回日俾頒教令初未嘗假以事權現在南路新設道羅州縣各官委署已歷年餘規模漸具不乘
此時益為變通則過此以往又必有積重難返之勢況阿奇木等承充伯克多係三品四品州縣官階尚
居其下鄉愚無知恐敢玩狎之漸而與州縣儼然並立於體制亦不相宜在部院諸臣以事屬吏章自應

長思熟慮而後見聞既確計非裁去回官實無以蘇民困而百治理上年通飭南路各屬州縣傳集各該城關阿奇木等伯克剴切開導諭以在所必裁之故准其各留原品頂戴仍視城關事務繁簡分設鄉約專司稽查卽於裁缺之回目選令承充並視品級之崇卑分送道廳州縣衙門充當書吏鄉約酌給租糧書吏酌給口食以資養贍不願者聽其鄉莊地遠驟難戶曉備有之伯克暫仍不裁遇有額缺亦不另補以則漸照城關一律改設鄉約現據各屬稟報自試裁城關伯克後經年以來甚覺相安毫無缺望回民去其疆敵意亦漸與官親若吏需以時日語言相通則疾苦可以自陳而弊習可期永絕矣容再由臣督飭各該地方官隨時察看務令措置得宜不敢稍涉因循憚於改易亦不敢過於操切致啟事端以仰副朝廷睦鄰西陲至意惟各城出力回目前以軍務方殷正資驅使或派令嚮導或委辦軍糧庶不能辭勞瘁若不立予獎勵無以作其急公向義之心當經臣與前督臣左宗棠前幫辦軍務臣張曜隨時核酌與以擬保翎頂行知俟集案奏請 獎敘現在歷年既久未便沒其前勞懇 恩俯念該回目等効力疆場 允照臣等擬保行知 賞給翎頂以昭激勸出自 逾格鴻慈得 旨如所請行○諭所事府少詹事李端棻御史熊景釗奏貴州地瘠民貧餉糈不足擬請改隸川督兼轄並請將雲貴總督改為雲南總督裁撤巡撫一摺國家設立行省均係因地制宜詎可輕議更張至所請貴州歲餉由四川撥給實以

丁寶楨籍隸貴州故能竭力圖維一節黔餉係戶部奏明指撥丁寶楨遵旨辦理並非專顧桑梓私情該少詹事等遽謂丁寶楨遷調他省餉需必至延宕識見殊屬淺陋所請著毋庸議○丁亥諭戶部奏止供錢糧缺額過多撥別官吏經徵積弊又核對民欠請頒徵信冊並擬章程式冊呈覽及立蠲緩徵信冊各摺片錢糧爲國家止供小民具有天良無不爭先輸納其偶有抗欠者不過千百中之一二全在封疆大吏督飭藩司各道認真考核立杜官吏中飽之弊上不虧國課下不腹削民生戶部綜理度支通權出入自以清盤止賦爲國用之大經現據詳晰查明正雜糧項賦稅每年短徵在一千一百萬兩以外推求其故報荒不實報災不確捏完作欠徵存不解交代延宕以上五弊屢經該部奏陳通行乃各省鋼習成風因循怠玩錢糧弊竇愈積愈深若不嚴申禁令痛除宿弊年復一年伊於何底近年各省短徵之數據奏以安徽及江蘇之江甯爲最多蘇州江西次之河南又次之其餘各省除四川全完外均虧缺一二分不等此次該部摺內既指出致弊之由復屢陳除弊之法著各該督撫查照該部所籌辦法各節嚴飭所屬逐一整頓實心實力期在必行用人理財爲疆吏專責果能政事修明財用不患不足倘以簿書爲故事視誥誡爲具文經徵錢糧仍前弊混該管上司相率徇庇即著該部將該督撫藩司糧道指明廢參決不姑容其捏造民欠一節蠶蚩愚氓莫可控訴允宜定一簡使之法俾民間共知共曉該部所議民欠

及調緩徵信各冊立法已爲詳備然有治法賴有治人若循頒發之名無稽查之實則一紙文冊仍無實濟著各直省督撫飭令該管道州分設徵信冊必須設法確付鄉閭勿令稍有隔闕仍不時下鄉按冊抽查總期與民相親不憚煩瑣庶窮簷百姓報上之忱纖悉必達一切侵挪影射之弊不難盡行革除我朝政崇寬大大兵大役從未加賦於民自錢糧收不足數不得已而權貸抽釐物價增昂民用不裕朝廷念切痼瘼豈忍追以追呼致失愛民如傷之隱現在清釐錢糧專杜貪吏侵欺之弊毫不擾累閭閻倘有不肖州縣巧立名目藉端苛斂或刁劣紳士造言煽惑包攬把持均著執法嚴懲以挽澆風而裕正課但得錢糧漸次足額釐金即可量減酌裁與民休息是爲股盼至每年因災調緩一經督撫奏到無不立沛恩施而所敘災區調緩各節前後套搭動輒牽混適用胥吏舞弊之端嗣後各省奏請調緩務將各屬銀米等項分縣開單俟降旨允准後卽照單開數目刊刻磨黃福行曉諭庶使識字農夫一覽瞭然應調應緩絲毫無混用副體恤民艱實事求是之至意餘均照該部所議行將此通諭知之單冊併發○戊子諭前據翰林院侍讀學士梁燿樞御史黃煦鴻臚寺卿鄧承修先後奏參廣東惠州府科試幕友串通舞弊學政葉大焯貪利無厭等情送諭彭玉麟張之洞確查具奏茲據會同查明詳晰覆奏此案貢生戴羅俊薩庭陸經葉大焯延聘校閱試卷明知匪徒投買關姓輒敢仇法營私乘學政患病之時朦混取卷圖得

謝禮雖未入手僅予杖徒不足懲辜載羅穰庭隨著革去貢生杖一百流三千里葉大燁身在學政
衡文別弊是其專司宜如何嚴密關防杜絕弊習此案雖據查無實蹟情事惟因偶患病竟將閱卷委
之幕友任令句串匪人希圖漁利已屬咎無可辭且於捉獲文章之時意存苛求缺額不補以冀迴護前
非實屬有辜職守翰林院侍讀學士葉大燁著卽行革職餘著照所議辦理○諭前據張之洞
等奏參知縣王懋官委辦礮臺工程訪有浮冒情弊當諭令將王懋官先行革職嚴訊辦茲據張之洞
等奏稱查明該革員浮開銀兩分別追賠請旨懲儆已革候補知縣王懋官承辦礮臺工程支應局務任
聽司事舞弊浮開冒銷銀數至五萬三百餘兩經該督等查訊究追始據如數賠繳並應從重懲辦以儆
效尤王懋官著發往軍臺効力贖罪餘著照所議辦理該部知道○己丑吳大澂奏臣初與李鴻章商
議在吉林創設機器廠奏調廣東道員溫子紹該員以親老告辭臣又奏調天津製造局總辦道員王德
均上海機器局委員通判徐華封福建船政局委員縣丞游學詩均經該省督撫臣奏留咨留不獲調吉
差委臣心焦灼萬分有寡助之憾幸同知宋春霖等數員經臣往復商情詞懇切該員等諒臣之苦衷
不憚跋涉航海而來其情可感其志亦可嘉此調員之難也吉林工匠起造房屋與南省不同而機廠之
牆壁門窗烟筒水道尤與尋常衙署不同該匠等目所未見語之亦各茫然稍一遷就工料不堅貽誤匪

細其磚窰灰窰應用物料均須加工定制審曲面執之方非該員等鉅細躬親晝夜督率不能建造如法非若津滬各局土工木工各有專責不勞而理此建廠之難也一廠之中以匠頭爲最要窰廠之中以機器爲最要安設鍋爐非熟手不可裝配機器非良工不就教授學徒鉤心鬪角規畫圖樣置範成模皆匠頭之是賴該匠頭等久在津局滬局資格尤深工食亦厚調赴吉林苦寒之地視爲畏途人人裹足或來一兩月卽託病而歸諸多掣肘現在局中不乏良材皆宋春榮等設法招徠苦心孤詣此選匠之難也機器大宗皆購自德美各國鋼鐵物件多聚於津滬馬頭一水可通之區驗收較易百貨所萃之處精選何難若吉林所購機器洋人在津滬交收委員亦須在津滬查驗吉省本局之員既不敷用不能不求助於津局並有隨時需用物料陸續購運應用不窮此等瑣屑煩重在吉局爲應辦之事在津局爲分外之勞臣所列保天津製造局數員亦爲隔省辦事不分畛域者勸此購器之難也機器重件船運已極操心陸運尤爲費力營口初無馬頭輪船不能傍岸非若天津上海就船起運人力易施自營口至吉林有山路崎嶇高坡上下霖雨之後積潦滿途覆轍之車傷人及馬以數千百觔之重載行數千百里之長途僕夫驚怖津吏駭聞他省機器局創辦之初無此艱險此轉運之難也以上五難皆吉林創設機器廠時實在情形核其勞績在吏部新章未定以前若因格於部議不能與上海天津各局創辦人員一律保獎該局

員等未免向隅懇 恩俯念該員等數年以來締造艱難 特旨准照臣等前次所請給獎出自 恩施

逾格以後不得援以為例允之○庚寅諭都察院代奏貴州貴陽府遺缺知府道爾巽敬竭懃忱一摺內

據寫錯誤殊屬疏忽道爾巽著交部議處○以蔣捷才為甘肅涼州鎮總兵○辛卯 上詣 太廟行禮

○諭吏部奏遵議處分一摺前因黃體芳陳奏事件妄議更張跡近亂政欽奉 懿旨將該侍郎交部議

處茲據奏稱照妄行條奏議以降一級調用係公罪例准抵銷等語所議過輕殊未允洽兵部左侍郎黃

體芳著降二級調用該部堂官著傳旨嚴行申飭○欽奉 慈禧端佑康頤昭豫莊誠皇太后懿旨神機

營王大臣奏前步軍統領榮祿會係同管營務創練鎗隊之員照章既已報捐鎗價銀兩懇請賞給獎敘

等語頭品頂戴降二級調用前步軍統領榮祿情殷報効洵屬急公准開復降二級調用處分該部知道

○轉會紀澤為兵部左侍郎以廖壽恆為兵部右侍郎○壬辰 上御中正殿閱視跳步札○癸巳歲暮

禱祭 太廟遣奕詳恭代行禮○是年統計出口貨值銀六千五百萬五千七百一兩進口貨值銀八

千八百二十萬十八兩相抵虧二千三百十九萬四千三百七兩凡徵貨稅銀一千四百四十七萬二千

七百六十六兩

光緒十二年丙戌春正月乙未朔元旦節 上至 奉先殿行禮 慈禧端佑康頤昭豫莊誠皇太后御

慈寧宮 上率諸王大臣行慶賀禮御中和殿受禮太和殿受賀至 大高殿 聖人堂拈香○丙申命

於直隸古北口建昭忠祠○丁酉 上詣 奉先殿 壽皇殿行禮○戊戌諭陳士杰奏驗濟決口合龍

日期一摺上年山東河工直莊驗濟決口兩處數月以來經陳士杰督率堵築其直莊決口已於十二月

初八日合龍茲復據奏驗濟決口經在工員弁衝寒蹈險竭力搶堵亦於十二月二十二日合龍二十七

日將後倉一律堵築穩固覽奏稍慰廑系陳士杰著加恩開復降三級留任處分著該撫將各工防堵事

宜認真趕辦務期悉臻妥洽以衛民生所有兩次出力各員著准其併案擇尤保獎毋許冒濫○以蘇元

瑞爲貴州威寧鎮總兵○命春滿爲厄魯特領隊大臣○己亥諭朕於二月二十七日恭奉 慈廟端佑

康頤昭豫莊誠皇太后啟鑾三月初二日祇謁 東陵是日節屆清明恭詣 普祥峪定東陵行殿土禮

隆恩殿行大饗禮並恭謁 惠陵禮成後於初七日還宮所有應行典禮並一切事宜著各該衙門照

例敬謹預備○庚子諭悼親王年近六旬一切行禮差使允宜特加體恤嗣後致祭 壇 廟暨 壽皇

殿元巨大祭應振恭代均著毋庸開列 奉先殿大祭並著毋庸輪班行禮其各處陪祀差使一併加恩

免其到班以示優禮恭親王意○辛丑祭 祈穀壇遣載敦恭代行禮○壬寅 上御紫光閣闕殿殿○

頒給臺灣澎湖 城隍神匾額○予直隸天津縣孝女張樹香旌表○癸卯 上詣 太廟行禮○甲辰

時享 太廟遺本格恭代行禮○親王銜惠郡王奕祥卒命貝勒載澐前往奠醑照郡王例賜卹子載澗承襲貝勒載濟封三等鎮國將軍○乙巳吏部尚書崇綸復因病乞休不允予續假一月○以管祺為內大臣○調錫珍為鑲白旗滿洲都統奎潤為鑲黃旗漢軍都統○諭兵部奏請飭催積欠租銀一摺直隸各州縣應解兵部馬館地租生息銀兩積欠甚多本年二月朕恭奉 慈禧端佑康頤昭豫莊誠皇太后祇諫 東陵該部恭備要差應付車馬繁多需款孔亟著直隸總督飭令藩司無論何款即行設法於歷年欠銀六萬餘兩內先撥銀三萬兩限於正月內撥解到部毋得遲延嗣後務須年清年款不得再有拖欠○丁未諭福銀等奏請飭兩淮措解利銀一摺兩淮應解步軍統領衙門利銀歷年拖欠至六十餘萬之多本年二月間朕恭奉 慈禧端佑康頤昭豫莊誠皇太后祇諫 東陵所有隨扈官兵應領口分及各旗營修墊道路需款甚鉅自應先事豫籌以免貽誤著兩江總督嚴飭兩淮鹽運司即於前欠利銀內先行籌措銀四萬兩批解步軍統領衙門以應急需倘該運司一時難於籌解即由兩江總督在藩庫內無論何款提銀四萬兩剋期起解限二月二十五日以前如數解到仍由該運司籌解藩庫歸款毋稍遲誤○己酉 上詣 大高殿 壽皇殿行禮畢詣北海 永安寺拈香○辛亥諭軍機大臣等本日據李鴻章電稱法使接越電北圻先安州九頭山有廣東兵輪四帆船六弁兵登岸似將占踞法擬調兵船往

請等語覽奏不勝詫異此事既無論有該省又未奏報何待遽爾派船前往恐係謠傳不確現當分界未
定豈可自生枝節貽人口實著張之洞迅即查明電覆若果有其事即著剋日撤回勿稍遲誤該督身膺
重寄惟當力全大局儻固執成見敢啟疊端定惟該督是問懷之○壬子諭內務府奏恭備喪差懇飭僅
欠欸一摺本年二月朕恭奉 慈禧端佑康頤昭豫莊誠皇太后祇謁 東陵該衙門差務煩多需欸甚
亟著陳士杰將山東歷年拖欠帑利生息先籌解銀二十萬兩以應要需○乙卯諭榮頤等奏請撥欸
項一摺據稱現在恭辦喪差永濟庫無欸可籌請由直隸藩庫撥銀一萬兩於二月初十日以前委解等
語本年三月祇謁 東陵應辦各差需欸孔亟著直隸總督飭司照案撥給以應要需○諭英廉奏循案
請撥庫項一摺據稱現在恭備喪差永濟籌備兩庫欸項拮据請由直隸藩庫不拘何欸撥銀一萬二千
兩迅即委解等語本年三月祇謁 東陵應辦各差需欸孔亟著直隸總督飭司照案撥給以應要需○
丁巳予貴州貴筑縣節婦陶王氏旌表○戊午李鴻章奏輪船招商局之設原因各口通商以來中國沿
江沿海之利盡為外國商船佔故設法招集華股特創此局以與洋商爭衡庶逐漸收回權利關於
國家體制華民生計極巨亦實為中外交涉之大端惟船棧碼頭各項成本甚重與洋商分贖客貨常年
所得水脚無多且洋商心懷嫉忌屢次跌價傾擠上年又遭法兵之擾海船難行遂致局本層遞虧折該

國等無法支持不得不暫借洋債以濟急需當此局勢岌岌之際必須官爲維持乃可日就起色葉廷春所陳各節頗有見地但局船裝運鄂鹽及展緩運漕限期兩條不無窒礙應無庸議其運漕局船回空照沙船免稅一條查運漕沙甯船回空凡在北洋三口裝載豆貨雜糧等項向准全免出口稅在案局船本可照辦惟恐免稅較多於稅項有礙飭據津海山海東海江海關道議復嗣後商局輪船運漕回空請免北洋三口出口稅二成如原來裝米一千石回空時免收出口貨稅二百石查照派運米數通批免足二成仍照沙甯船少免八成以示區別又湖北聯合茶一條飭據津海江海漢關道覆稱合茶向由鄂豫內地運赴張家口蒙古地方租枝大葉價值最輕嗣後如華商由鄂附搭商局輪船出口請照磚茶之例每百觔減爲出口正稅銀六錢並免復進口半稅庶局船藉得水腳他船不得攪載其由津北運張家口外仍照常沿途內地稅釐以上兩條應請均自本月開辦起另將執照保單及稽核章程核定分飭遵照惟葉廷春原請各條以運鹽爲大宗今運鹽既有窒礙僅運漕回空免稅二成及裝運聯合茶兩項尙可酌准統計所沾利益每年不過合銀二萬兩左右局累既深實不足以資補救查該局奏定章程原擬藉運漕水腳以補攪載客貨之不足局中有此津貼方可與洋商爭衡而不爲傾擠前曾議明局船應得水腳悉照沙甯船定章每石實銀五錢六分零未幾又有扣減上年美商旗昌與英商怡和太古輪船承

運漕積減爲三錢五分實則支用不敷皆各虧本夫彼族之甘認此虧而爭運者蓋明知洋輪運漕可暫而不可久華商力量微薄藉以去其運漕津貼將立見傾覆而江海輪船之利仍可專歸於洋商其心計極爲狡狴若不杜其覬覦則華商之氣益倭洋商之氣益張恐中國商務一蹶不可復振 朝廷視華商之輪船與沙甯船原無軒輊現在沙甯船運漕每石應支銀四錢三分一釐零所有本屆商局輪船運漕應請仍照沙甯船現領之數支給以後一體照辦不再區分扣減亦不扣海運局公費以免虧賠而資津貼輪船運漕較沙甯船多一保險及麻袋之費其修費亦大今支欸照沙甯船一律庶昭平允且轉運迅速不致久存船內卽有蒸變過險又可取價是於公家亦殊有益湖北湖南江西採辦漕米飭由該局代購運交其運費亦應照四錢三分一釐零核給俾無歧異又該局原有各省官本及光緒二年買併旗昌船棧案內前南洋大臣沈葆楨奏撥官本未還銀一百七十八萬餘兩於光緒六年奏明由運漕水腳項下分年扣還其時局中借欠商欸有限遂議先還官本尙屬急公今計歷年扣還並湖北軍需扣欸業已過半尙應還銀七十七萬餘兩而該局現欠洋債計有一百餘萬兩若令官本洋債一併拔還商力萬不能速查所贖各省官本七十餘萬內本有閒欸亦非急不可待應請暫緩拔還免扣水腳各項以示體恤俟洋債歸結後卽令分年籌繳官本不准短少庶免失信外人亦不致同時催逼舉動全局查奏

西各國商務多由國家出費補貼即日本新定輪船公司章程議明十五年間由政府保認商民股本按年八釐利息該公司向來所負之債並歸政府股分內所得子金償還誠以商務興廢關係國計強弱必相與維持於不做中國幣藏非裕趨尚不同若保認商民官利代還債自勢有不能自應妥籌可行之策今所擬運清水脚仍照沙甯船之數並無增益其回空免稅則較沙甯船核減卅合茶減稅甚微官本俾止緩繳實於公家並無甚損而該局商困藉可少舒軍關中國商務要端非此斷不足以敵洋商而保我權利相應仰懇 特恩俯准照辦以作商民之氣大局幸甚至該局自去秋向旗昌收回後已遞派道員盛宣懷認真整頓經理釐定章程力除弊習務使商民信從可資經久江海津海關道本飭隨時會同局務應併令江蘇糧道與江海關道通有要件隨時會同局員籌商協助俾資利便下戶部知之○命貝子奕謨管理武英殿事務○以托克滿署成都將軍○庚申諭軍機大臣等鄧承修電均悉前電諭先勘原界再商改正原因北圻末站春深炮起彼自退然後以秋末續議為結果彼自無從藉口乃該大臣等不能體會此意空言爭執迄無成說至此次仍有我之改正必以淇江為界牧馬先安為斷等語若果從此准議彼必以此違約為口實預留後日爭端辦法殊屬非是著鄧承修等即行知照浦使狄所允商伊既翻悔不認則遵旨先勘原界之議更不可緩即約彼迅速會同履勘所爭新界暫置不論如彼因釐

生求去則我仍是照約結束彼更何辭可藉該大臣等辦理此事務存遠大之識切勿見小拘執致誤大局慎之○壬戌諭軍機大臣等二十六日已電諭鄧承修等仍約會法使履勘原界所爭新界置不論說可奉到法人於此事極願速了機不可失著鄧承修等迅速遵前旨催其會勘不准稍涉延宕儼彼因瑣求去議立草約必須聲明兩國因春深燈起商允秋後再勘免致別滋藉口切勿固執已見貽誤大局自干重咎並將商辦情形卽日電聞○頒給直隸承德府 城隍神 龍王廟匾額○調巴克坦布爲鑲紅旗滿洲副都統以清安爲正白旗漢軍都統○甲子諭朕恭奉 慈禧端佑康頤昭豫莊誠皇太后祇謁東陵業經降旨於三月初七日還宮所有本年會試應行聽宣之考官等著改於三月初八日聽宣入闈應試士子定於初十日點名入場其餘一切事宜仍著該部查照定例辦理○先是光緒十一年十月准軍在朝鮮定亂陣亡受傷官兵四十餘名經該國王咨請禮部轉奏請卹至是 上諭陣亡官兵忠勇捐軀殊堪嘉憫著照該國王所請從優賜卹

二月乙丑朔撫恤琉球遭風難民○丙寅諭軍機大臣等本日鄧承修自南關電奏各節不勝詫異幾次電諭該大臣等先勘原界並不遵旨速辦輒思託病回能又不請旨遵行遽與照會緩至秋末再辦是緩辦一語自我先發正與前旨相背鄧承修執拗任情罔知大體李秉衡同辦一事何以隨聲附和於此次

諭旨若罔聞任令鄧承修肆意徑行一至於此仍著懷遵前旨即行知照浦使先勘原界懲釐發趕辦不及亦必勘解一二段先立文據俟秋後再勘若再託故遲延始終違誤必當從重治罪懷之愾之○諭軍機大臣等朔電已悉戈使所議商約一切各款均於中國無損則土貨出口減稅一層儻不能議到四分減一或即照前電減三之一與之定議著李鴻章妥籌辦理勿因界務再宕○子湖南湘鄉縣節孝婦陳馮氏旌表○丁卯楊昌溶奏查泰西各國新出各種後膛鎗砲隨配藥子箇中來購雖有寬備但一經用竣鎗砲不能施放查同治八年閩省曾購有修造洋鎗車牀機件爐座一付於省垣水部門內設廠開辦規模本屬小就停止已非一次上年辦理海防又復招匠往廠添造鎗砲各子並派浙江候補知府張冕督同辦理據報廠所備料不敷展布勘得廠內餘地及新購旗營屋基共可添蓋製造後膛鎗子銅帽廠房五間打鐵廠六間工匠儲料房十三間委員司事等住房五間當委員候補道高企辛勘估共需工料銀二千四百餘兩查核所估添修廠屋工料銀數尙屬核實應請准其照給興辦據閩省善後局司道詳請奏咨前來○復查此項工程必不可省所估亦無浮費下部知之○戊辰祭社稷壇遣世鐸恭代行禮○諭軍機大臣等鄧承修冬電已悉仍著懷遵初二日電旨知照浦使先勘原界如實因病重不能親往勘界即著李秉衡前往與浦使會勘鄧承修仍不得擅自離關俟事定聽候諭旨並將

現辦情形迅速電聞○已頒給奉天新民廳 柳河神 城隍神寬甸縣 關帝廟 城隍廟匾額○

庚午欽奉 慈禧端佑康頤昭豫莊誠皇太后懿旨本日召見醇親王據稱前奉諭令抽練旗兵現在調取各營惟鑲黃旗蒙古鑲紅旗蒙古正藍旗漢軍三旗弁兵極為整齊其鑲黃旗滿洲等旗固有未到的者至正白旗蒙古則全隊未到等語現當練兵伊始似此任意疏懈實屬不成事體若不予以懲儆營伍何由整頓所有正白旗蒙古都統烏拉喜崇阿副都統明魁染爾慶阿均著交部議處其承辦之參佐等官並著查取職名交部嚴加議處嗣後各該旗奉調抽練如有無故不到或隊伍不齊即著神機營王大臣隨時奏參毋稍瞻徇○諭軍機大臣等此次電諭鄧承修李其衡會商法使先勘原界機宜所繫前論已詳乃該大臣等並不遵行辦理因執已見託病遷延昨鄧承修電稱即重治罪亦復何辭並少重明察等語已屬負氣本日李其衡電奏各節尤為執謬據奏三城實有可得之機法國斷無輕開之衅李其衡有何把握而為此臆度之語豈竟未暇法外部電信所云耶界務改正以及通商在涼山以北新約業已訂明法國豈能違約妄索徑議入能通商至驅民入教之語更屬無據朝廷特命該大臣等勘界關繫如何重大豈僅派一道員所能了事備詞規避始終執拗殊屬大員委任鄧承修李其衡著交部嚴加議處仍遵前旨迅即履勘備再玩延致誤大局著英治罪成案具在試問該大臣等能當此重咎乎○俞松濬潘

祖陵敬信畢道遵承修 東西陵工程○辛未頒給福建興化府 城隍廟匾額○甲戌吏部尚書崇綺復因病乞休允之調錫珍爲吏部尚書麟書爲刑部尚書崑岡爲工部尚書以紹祺爲理藩院尚書○內子張之洞等奏粵東山海交錯民情犷悍盜匪之熾甲於他省溯查同治二年間前督臣毛鴻賓奏奉上諭嗣後廣東省除廣州府及佛岡同知拿獲逆匪盜犯仍行解署外等因欽此歷經遵照辦理嗣於光緒八年四月刑部議覆御史陳啟泰等條奏內稱嗣後除土匪馬賊會匪游勇案情重大並形同叛逆之犯均准就地正法其餘尋常盜案子限一年規復舊制倘實係距省寫遠均照秋審事例解送該管巡道訊明由督撫分別題奏不准援就地正法等因奏准咨行到粵復經前督撫臣議奏嗣後除實係土匪馬賊會匪游勇案情重大並形同叛逆之犯及原河內罪應斬者仍由該州縣體察情形隨時稟請就地正法按三箇月彙奏一次其餘尋常斬犯盜犯自光緒九年五月初八日爲始規復舊制高雷瓊潮韶六府並應南雄二直隸州解道覆勘移司核詳題奏免其解省不准先行正法經部議覆准咨行飭遵在案然自此次省章既行以後盜案日多近年海防多事以來各路投營遣撤之游勇紛至沓來往往勾結土匪打單嚇財入村攔路劫掠慘殺加以各處積匪結黨拜會受僱助闖肆掠勒贖此外洋犯隨島縱橫出沒時而在洋伺劫時而登陸剽掠一經兇拿輒即連橋結陣放礮抗拒形同叛逆本年以來已經多起

其內地之東西北三江均為盜匪之藪往來舟楫以及各處渡船動輒被劫陸捕則駛艇而逃水緝則登岸而逸上等接閱各屬稟報劫案以及另行訪聞查出盜案日凡數起無一非執持洋鎗火礮糾聚多人其事主懼禍未經呈報者不知凡幾雖經懲儆該管嚴防勒拿並將情重者匪批行正法以期稍知儆懼無如營汛戒備有司掙牽實情不盡稟聞真盜或致狡脫以致水陸盜案有增無減省垣附近屢有白晝行劫近日英國貢翰商輪亦有在洋面被盜匪劫殺船主之事商民悚息伏莽日深是目前粵省土匪會匪游勇隨處闖匪洋盜七種合而為一若再因循拘泥必致釀為亂階等職任地方觀此情形實深焦慮查光緒八年部章曾經指明土匪馬賊會匪游勇案情重大並形同叛逆之犯均准就地正法所謂案情重大四字包括甚多原未嘗稍形寬縱即粵省奏定章程亦係聲明此項土匪各犯及原例非應斬梟者均准就地正法乃各州縣狃於積習不問案情輕重藉口已復舊章不肯從嚴稟辦經年以來文告諄諄拘執罔聽除南番兩縣外罕有稟報拿獲游勇土匪嚴辦之事是以匪徒益無忌憚恣意橫行查就地正法章程原屬詳以止辟部章所謂案情重大自係由地方官酌核情節近來各直省辦理持械夥劫凶暴聚著之案皆係不分首從一律先行就地正法局示矧粵省盜匪無一案非糾夥無一盜不持械所持之械無非洋鎗洋礮乃獲犯訊供無一盜非迭劫多次且忽海忽陸忽土忽客忽自行糾劫忽助闖逞

兇又與會匪械關各匪洋盜驟易互相出入其情節既與尋常盜賊迥異即如內河外海各盜駕船列礮
大伙橫行劫殺拒捕是廣東艇匪一項較之北省馬賊騎止一人人止一鎗尤爲兇悍實爲土匪之尤若
拘泥本省章程凡劫決盜犯情節雖重仍無由明文者動須解勘題覆轉稽延不足示儆甚至狡
翻誣扳劫逃越獄囑患不可勝言至此等盜匪多有此案附夥而彼案糾邀此案行兇而彼案接應其惡
不畏法之心同惡相濟之罪實屬難分軒輊若過爲文法所拘必致意存避就倖逃招誅此非因時立制
實不足以安善良而遏亂萌也等督同臬司廣州府等體察地方情形悉心核議應請嗣後拿獲持械夥
劫兇暴聚著之各項盜匪無論水陸不分首從凡有案情重大非干物易物決者一體照土匪馬賊會匪
游勇章程先行懲辦其距省較遠者由該臬州縣審實後酌核道路遠近如有道府同城者解山該管巡
道督府覆審不同城者即分別解山最近之該管或道府州覆審如犯多路遠者即由道府州親赴所
屬覆審均錄供通憲督撫核明情節確實批飭就地正法案情重大者仍傳首犯事地方懸桿示衆其旗
州府屬及佛岡赤溪二直隸同知所獲盜匪仍於審實後錄供解府審明通票批交臬司會同營務處司
道覆審明確稟候核飭就地正法案情重大者爲示曉示民間拒捕者格殺勿論並將通省此項正法盜
匪按三箇月彙奏一次逐案補具供看山府送司詳咨一俟盜風止息即照舊例辦理州縣營汛謹盜縱

匪者查出從嚴參辦據署按察使瑞璋詳請具奏前來等詳加覆核不敢拘泥以殃民惟有嚴法以弭亂考諸文武軍民人等家諭戶曉得旨刑部速議具奏○岑毓英電致李鴻章奏上諭據曾紀澤電信有近商緝舉潞江東地咸歸中國等因查潞江源出喀末流入雲南在瀾滄之西滇省維西中甸騰越龍陵各屬以及八關九隘野人山均在潞江以西前議斷不可許讓緬自有萬界不以水判即潞江西之龍川江亦山瀆入緬騰越關隘且在龍川以西也界務重大請旨飭曾更正請代奏上諭軍機大臣等岑毓英冬電已悉曾紀澤前奏潞江本係伊拉瓦底江之誤入募新街傍伊江岸至江確在騰越之東總理衙門備查地圖與該督所奏相同早經電知曾紀澤更正矣英因外部換人前所允又有翻覆現仍飭曾紀澤堅持存緬祀之議與之力爭俟有成說再行諭知○以托倫布為察哈爾都統○丁丑諭朕於二月二十七日啟鑿後減派惇親王大學士恩承協辦大學士尙書福錕尙書翁同龢都察院左都御史那世長留京辦事惇親王恩承翁同龢那世長四人分日輪班在內值宿不住宿者於申刻散直福錕每日進內辦事後無庸值宿午刻先行散直○調張曜為山西布政使高崇基為廣東布政使○以沈秉成為內閣學士○命禮部左侍郎徐郁仍在南書房行走○戊寅召山東按察使林述祖入京○已卯諭本年輪應查關山東河南江蘇安徽江西五省營伍之期山東即派陳士杰河南即派邊寶泉江蘇即派

曾國景安徽卽派吳元炳江西卽派德馨逐一查閱認真簡校如有訓練不精事實不齊者卽將廢弛之
將并振實參各勿得視為具文○額勒和布等奏 諭旨以前江西學政陳寶琛奏請以故儒
黃宗義顧炎武從祀 文廟 命廷臣集議經禮部會同臣等奏駁同日尙書臣潘祖蔭等另摺請准從
祀復奉 上諭大學士六部九卿翰詹科道再行詳議具奏欽此○等復虛衷詳核博採羣議竊維兩廡
從祀 典禮至重自非德行學問醇深粹美公論允符未可濫舉祖豆伏查尙書潘祖蔭等另奏於該二
儒之著述經濟綜舉二端酌古準今推崇備至亦實具闡揚樸學挽回空輒之深衷然禮 原議於 欽
定四庫全書提要辨駁該二儒著作各條詳加徵引並仰稽 聖訓參核定章以爲 天語煌煌允宜遵
守該二儒學術亦伴著述家言未有躬行實踐不足當闡明 聖學傳授道統之目惟志節矯然博瞻通
貫足爲闡發矜式宜停其廡祀准祀鄉賢泊屬立議持平衆心允協蓋論說紛歧必衷諸 聖我 朝旌
善崇忠崇儒重道馨香之報不止一途而惟廡祀一層至爲嚴重伏查雍正二年 世宗憲皇帝肅正祀
典特頒 明諭謂先儒從祀 文廟關繫學術人心必詳加考訂折衷盡善庶使萬世遵守其時從祀兩
廡之載聖何休鄭眾盧植服虔陸贄韓琦或有功經學或勳業昭垂悉從罷議迨道光以來撓案請祀者
漸多 宣宗成皇帝於禮部准祀李容一摺復降 諭旨謂似此者亦不乏人何能盡登兩廡 特予駁

斥是以咸豐十年禮部議祀明儒曹端奉 文宗顯皇帝硃批大學士申機大臣另行妥議並酌定以後從祀章程不可漫無限制遵例不准援案欽此洎同治三年御史劉毓楠奏附祀新章過嚴請再行覆議復奉 上諭推該御史之意必將舉古人之講學著書者悉登之兩無之列而不日躬行實踐師法聖賢實爲身後從祀之計議殊屬迂謬所奏著毋庸議欽此仰見 列聖垂謀因社祀漸多豫防流失 綸音申戒至再至三而 文宗顯皇帝不准援案之 諭尤於後來議祀者舉此例較短絮長臆見各殊紛紛聚眾之弊先幾洞晰曲折靡遺况我 國家文教昌明碩儒林立漢宋兩學並臻極盛若其著述瓌疵曾經 欽定鑒別而學術之精純經綸之卓越又未能悉符眾望者遂漸推廣請祀實非所以慎重禮節等仰 聖諭之周詳參考同官之議論竊見黃宗羲顧炎武二儒之學篤信好古別有餘純粹以精則不足其詭祀 文廟之處仍照禮 原奏議駁而博通淹足以矜式後學亦如原議仍請 准其入祀鄉賢以示優崇而昭區別 上諭前因禮部會奏議駁陳寶琛奏請以黃宗羲顧炎武從祀 文廟與尚書潘祖蔭等另摺請准從祀意見兩歧當命大學士六部九卿翰詹科道詳議具奏茲據額勒和布等仰 列聖垂謨參考廷臣議論請照禮 原奏議駁等語黃宗羲顧炎武卽著毋庸從祀 文廟仍准其入祀鄉賢以重明禮而昭矜式○以成祺爲山東按察使○以薛福辰爲順天府府尹○庚辰朔

日於東郊遺本格恭代行禮○命芬車克勤景善查勘 東陵紅橋○理藩院左侍郎阿昌阿因病乞休
允之○辛巳調嵩申爲正白旗滿洲副都統帥曾爲鑲藍旗滿洲副都統以德降爲鑲紅旗蒙古副都統
○以崇禮爲理藩院左侍郎○斐蔭森奏查船政局學堂招考文學聰穎子弟學習製造及駕駛管輪
名曰藝童自選充入堂之日始日給飯食銀七分五釐並月給銀四兩俾贍其家繪事院習圖算者亦照
此例藝童招考實力壯健子弟分派各廠學習工作名曰藝徒自選充入圖之日始日給工食銀一錢五
分經前大臣厯辦在案溯自開局迄今學堂藝童繪事院均多成職年來習學者漸衆上諭蔭蒞工後因
於前後學堂繪事院增添學舍以廣育藝童前裁藝童併歸案考工今復設藝童以多招藝徒改定章程
自光緒十一年起各學堂繪事院新招藝童只給飯食不給磨銀學習三個月後考定留堂者始行於日
給飯食外月給磨銀四兩藝童新招藝徒日只給工食銀七分五釐隨時察看學藝有進再行加給於增
植人材之中仍寓樽節經費之意下所司知之○壬午命禮親王世鐸慶郡王奕劻奉恩輔國公載灃在
內廷行走○命內閣侍讀學士林維源前赴臺灣同劉銘傳辦理臺北開墾撫番事務○癸未 慈禧
端佑康頤昭豫莊誠皇太后選看秀女 飭主公文武大小官員毋入神武門○上御 紫光閣閱煙火
○甲申撫恤琉球遭風難民○丙戌諭御史愛興阿奏請嚴拿匪徒一摺京師重地豈容不法匪徒肆行

無忌著步軍統領順天府五城御史按照原奏所開姓名除已獲各犯外嚴飭兵役迅速捕獲不准一名漏網以靖地方原摺著鈔給閱看○張之洞等奏據廣東按察使于蔭霖詳稱查粵省民情强悍每因匪此小怨由山細故輒即不候官斷招雇外匪約期械鬪主鬪之人大率係其族首族紳祠長之不肖者名爲兩族兩鄉互鬪實則臨時雇募土匪鹽梟海盜及一種專習綫鎗游手亡命之徒號召者或數百人或千餘人附和者或數村或數十村外洋利器隨處可購是以洋礮洋鎗器械刀械無一不有又復高築寨牆建造礮臺有攻擊三五年而互鬪不已者有已經和息而挾恨復鬪者臨鬪之時高豎大旗對放巨礮若攻入彼村即恣意焚殺搜搶所燒房屋動以數百間計所殺人口動以數十名計甚至掘毀墳墓擄捉男女拒殺兵差兇殘不法無異化外鬪勝之村動輒焚毀田禾諸蔗數百畝砍伐樹林菓園數千株故此數村經一次械鬪即喪失一二年或數十年之資產其隱害民生者尤非細微此等惡習惟廣州府之番禺東莞增城新會新會惠州府之歸善陸豐海豐博羅長寧河源潮州府之潮陽揭陽爲最他郡縣亦多有之其惠州府屬近日甚至傳聞有設卡斷路殘食人口之事殘忍藐法各省罕有互鬪之村鬪散即止無不據實具報而地方文武規避處分亦不免代爲隱飾習以爲常卽或馳往彈壓捕拿該匪等悍然不理兇鬪如故或迎拒官長不令入村或兵役無多不敢近前必俟其鬪散然後邀致鄰近紳耆從中排解

責令交匪繳械於是賄買頂兇任意排塞所繳者皆破壞無用之械所交者皆強壯老疾之人不特必非
爲首抑且並非爲從彼主謀擊斃斂錢糾眾幫闖行兇者轉得逍遙法外縱使懸賞拿獲而人多闕盜鎗
礮如雨之際究竟何人下手傷人何鎗何礮之傷最重亦屬無從質證照例懲辦罪止軍流毫無儆畏推
原其故由於粵民聚族而處祠產素豐事無大小皆聽族首族紳祠長號召族首等賢否不齊主闖者皆
藉勢兼恃財力取公帑以恣揮霍設眾費以供優游而所雇之匪徒又足以爲之羽翼但有得財之
樂從無償命之苦地方官因無兵力傳首謀則不到勒兇匪則不交官法既窮私忿益熾以故江河日下
擊相效尤歷年大吏及地方官明知其弊特恐操之過急激成事端徒辦理不善之咎不得不將就了結
民強官弱法令不行實情不敢 上聞嚴辦諸多窒礙所以積弊至於此極也查從前疑逆滋事徒以資
癘成患馴至不可收拾今外患甫平內訌宜靖現奉檄行文武大員分往各縣匪鄉查明新舊各案推究
致闖之由判以曲直勒交積匪審明案據立予嚴懲各該處情形從民所便責成鄉長族長房長層層
鈐制約束化導以後迺有匪徒生事責令稟報網送以期永靖地方惟查例載廣東省糾眾斂錢約期械
鬪仇殺人數雖多致斃彼造一命者主謀糾鬪之首犯發極邊足四千里充軍二命者實發雲貴兩廣極
邊烟瘴充軍三命者發新疆給官兵爲奴四名以上絞立決十名以上斬立決二十名以上斬決賜示其

隨從下手傷重致死應行擬抵者各依本律例擬抵傷人及未傷人者亦按本律例分別治罪又廣東械鬪案內如有將宗祠田穀賄買頂兇擄毀械鬪者於審明後除主謀買兇之犯嚴究定擬外查明該族祠產酌留祀田數十畝以供祭費其餘田畝及所存銀錢按族支分散若族長鄉約不能指出斂財買兇之人者族長發遣鄉約杖徒各等語是下手傷重方議抵償主謀糾鬪不皆重典而爲從傷人及並未傷人之犯照爲從減等罪止滿流卽照軍器傷人亦止擬軍詳釋例文自以鄉里尋仇尙非鉅患僅言鬪則無焚擄之流毒僅言械則無鎗礮之利器僅言糾眾則無烏匪海盜之叢集僅言仇殺則無抗官拒捕之重情是以下手者仍照共毆主謀者尙多差等竊維今昔情形實多不同變通之道因時而宜重典之刑因地而用近年廣東械鬪聯村聚眾殺害無辜焚毀松場抗官拒敵傷及兵差形同叛逆罪坐所由主糾者似無寬貸之理而爲從之犯各項匪盜畢萃其中專以幫鬪爲生不過殺人漁利並非本族本村與彼造夙有不解之仇切膚之患鎗礮毒擊之際殺傷之多少亦不能自爲限制下手之輕重更無從推究主名撥其兇悍情實係真正土匪配所逃回必更報復滋害然非當互鬪之時派兵圍捕則真犯決不能獲主謀亦無從追究且使此鄉尋鬪受害彼鄉未經報復之時若早發官兵將肇衅之鄉認真圍捕能將首禍幫兇勒交數名立置重典則彼鄉冤情既平自不致尋仇蔓禍保全實多伏查同治六年刑部奏定章

程天津鍋匪數十人以上持械聚闖殺傷搶掠就地正法指捕者格殺勿論等語其所以特從重典者爲除暴方可安良況以廣東匪數累千百械必鎗礮較之天津鍋匪僅聚數十僅持刀械者情節尤重相應詳請奏明另立專條從嚴辦理寬免州縣處分或令實密實辦以儆兇匪而遏亂萌等情前來等查粵省械闖實爲諸匪之首惡俗不革內患堪虞該司所陳係屬實在情形惟有據實濼陳仰懇 聖明俯念廣東械闖日多情形兇悍盜弄匪實爲地方治亂所關 勅部特立專條准將粵東械闖匪犯凡糾眾數十人以上招雇匪徒施放火器殺傷人命擄虐男婦焚燒房屋搶毀資財之案其主謀者斂財糾闖者受雇持械幫闖審明素行不法兇暴顯著者無論殺傷幾名是否係該匪所傷均照土匪例不分首從一律就地正法情節重者酌加梟示向來管事之該族首族紳耆長於聚闖之數日不行出首既闖之後十日內不行交犯卽以主謀同論至闖鄉祠產雇其赴他鄉尋闖及定地互闖者除酌留香火資三十畝外盡數入官以爲義倉社學之用雇覓無資則亂源可止其因強鄉生靈尋闖弱鄉集眾應敵因而殺傷焚擄者但科闖罪祠產免其入官若此鄉雖經受害不候官兵拿辦自行糾匪赴他村報復殘害者不論致闖先後一律辦理其未傷人放火擄生劫財及人數較少者暨他村尋闖僅在本鄉自衛拒闖致有殺傷並無殘暴情形者仍照舊例辦理各屬再有闖案准其請兵圍捕務將主謀糾斂及各幫闖真犯拿獲

究辦抗拒者立予格殺並懇 格外天恩將從前凡有闕案處所之地方官無論已報未報概免其照得
處分俾免贖顧以後州縣遇有闕案據實報懲辦免其議處如再有諱匿粉飾致主謀闕匪達颺者一
鄉僻聲尋闕地方官不早請兵獲匪嚴辦以致釀成巨禍者均予從重參處庶足以抑強安弱漸變
盜風下部議奏○以彭大光為浙江海甯鎮總兵○丁亥張之洞等奏廣東莠民為害地方者匪有二類
一曰盜劫一曰拜會一曰械鬪盜以搶擄會以糾黨械以焚殺三者互相出入統名曰約會多則為盜盜
強則助鬪鬪久則招募會盜各匪皆入其中習俗相沿孽芽日甚擡害農商攪亂法紀盜以廣州府屬沿
海各縣肇慶韶州兩府沿江各縣及廉州瓊州兩府洋面為最多會以惠州州及毗連香港之九龍司等
處為最多高廉所屬亦漸蔓延匪以惠潮廣三府為最多廉瓊次之廣惠潮鬪徒則以香港澳門為窟穴
廉瓊匪徒則以越南為逃竄潮查同治以前潮州府屬最難治焚殺相尋田畝荒蕪商旅裹足錢糧抗
完民不畏官幾同化外經前督臣瑞麟於同治七年奏派署潮州鎮總兵方耀帶兵剿辦周惠匪鄉清釐
積案先後拿獲首要匪犯一千一百餘名盡法懲治民情大懼近十餘年來潮屬隨為安土嗣後同治十
年有查辦韶州翁源等處土匪廣州東莞劫擄械鬪之案同治十二年有剿捕東西兩省交界高廉等處
伏莽之案光緒三年有查辦惠州匪鄉之案無不備以兵威勒交匪犯器械一時稍為斂迹終以未經大

加懲創撤營之後其結盟拜會割闕報復如故比年以來沿海辦防未及清釐內地高州之賊曰惠州之松山於光緒八年十年先後滋事雖經創辦未絕根株兼以游勇海盜驍勇匪暴鄉悍族互相煽助勢黨類益衆仇殺益多礮火攻擊動連一二十鄉村鎮劫掠月至三三十起其大姓恃強凌虐聚匪抗官視爲常事非文告所能禁非縣汛所能理若不趁此軍事稍暇之時由統兵大員酌帶營勇前往應來滋事地方督同該管文武剖分以勞詳查畧由示以軍威勒令匪撤如敢抗拒卽行圍捕痛懲積惡重治高家甲嚴條約鈐柬化導則將來禍患誠恐未已上等維安且除芳百有明鏡是爲杜遏亂萌之謀必先辟以止辟之政迭經督辦欽廉防務前廣西提督馮子材署水師提督方耀督陸路提督鄭紹忠電商往復屢次面商均以此事爲應辦之事未可養癰遺患以致燎原難滅現擬將粵省各州縣著名匪鄉澈底查辦會匪盜匪闖匪一體清釐以惠潮爲一路廣州爲一路惠州海豐兩縣悍鄉最多匪徒最衆從前暨旗信亂已非一次近日情形兇橫且甚此處應先行舉辦擬以方耀專辦該處鄰近水師所轄者附屬其餘惠潮所屬各縣陸路提督轄者以鄭紹忠會同辦理以鄭紹忠專辦廣州屬番禺東莞香山新會新寧清遠花縣佛岡等處督同署廣州協副將鄭安邦辦理韶州平慶兩府界連屬者亦附馮其近海匪鄉則以方耀會同辦理以馮子材專辦欽廉等處其洋面盜匪及九頭山匪葉則飭陽江鎮

總兵黃廷彪統帶兵輪暨該管水師巡艇協同馮子材之軍剿捕至於訊供定罪究以前之案情立以後之約法必須道府大員會同妥辦惠州即委署惠潮嘉道益齡廣州即委署督糧道李鴻廉州即委署廉州府李璉會同辦理責令該道府等督率委員將捕獲捆送各匪調核案卷研究是非其情節較重素行不法有搗殺糾匪實據者即予正法餘則分別懲治責釋剪除積年巨惡以生其儆畏之心扶持一鄉端人並予以鈐束之柄略仿潮州章程設立約正約副族正族副房正房副責成稽查勸導給以札諭榮以頂戴匾額以後該鄉如有各項匪徒即令舉首捆送令悍徒皆歸於統紀獷俗以漸而轉移 國法彰明機瑕滌盪庶可保全良善杜絕亂階馮子材勦威風著性慈愛民以辦本地土匪自可裕如方耀鄭紹忠歷年辦匪久著成效均能明達事理不致冤誣眾所信服等又諄囑馮子材等轉飭各將弁辦案與賊亂有別捕匪與禦敵不同仍當酌量輕重寬猛相濟毋得過為操切至於劣紳豪棍保匪輕於此舉其為不使其造作謠言滋辭離搆恐所不免等惟有勸商辦法考究實情不以浮言而撼大局以仰副

聖主綏靖海疆子惠邊氓之至意得 旨允行○戊子諭太僕寺卿延茂奏已革湖北道員楊宗濂禮誼

較重不宜調委要差等語向來參革人員情節較重者不准留營効力楊宗濂前因聲名平常經營稅務致招物議被參革職自不應調辦要差致開倖進之路所有該革員總管武備學堂差使即著撤去由李

鴻章另派委員接管○以捐資助賑出力予通政使周家樹等優敘有差○己丑諭慶裕等奏查勘 福

陵 昭陵果房等處應修各工請擇吉興修一摺著欽天監於本年三四月內選擇吉期先行知照即著

盛京將軍會同工部侍郎屆期敬謹興修餘著照所議辦理○張之洞等奏籌議外洋各埠捐船護商情

形已奏派總兵王榮和知府余璣先赴南洋有名諸島詳慎周歷飭將設官造船兩事一併密加商度以

憑籌定切實辦法下所可知之○庚寅諭朕此次恭奉 慈禧端佑康頤昭豫莊誠皇太后祇謁 東陵

所有經行道路著派出之管道大臣及直隸總督督飭各該員弁兵丁嚴行稽察遇有隨扈員役以及太

監人等車馬踐踏並沿途藉差騷擾勒索等事卽著該管大臣及該督等查拿等辦至辦道各員如有草

率偷減修墊不藉口中車馬踐踏希圖卸責情弊亦著該督嚴查參辦○辛卯 上奉 慈禧端佑康頤

昭豫莊誠皇太后祇謁 東陵啟鑒○祭 歷代帝王廟並魁斌行禮○諭向來蹕路所經之處均加恩

蠲免錢糧十分之三朕此次恭奉 慈禧端佑康頤昭豫莊誠皇太后祇謁 東陵近畿各處入春以來

尚未得有透雨仰維 聖懷軫念民艱無時或釋允宜格外加恩以紓民力所有蹕路經過之大興通州

三河薊州遵化五州縣地方應徵本年錢糧著蠲免十分之四用示體恤闕有無已之至意○是月

俄羅斯國使臣博白偕回國參贊拉德仁署理○義大利國使臣盧嘉德因病回國國家署理